
Poetry of renowned Kashmiri Poets
Transformed into Standardised Devanagari-Kashmiri by
M.K.Raina
31.12.2004



सूची

दीना नाथ नाँदिम	०३
अमीन काँमिल	१७
वासुदेव रेह	१८
वहाब खार	२०
वाज़ महमूद	२२
लालु लक्षमन	२४
हब्बु खोतून	३२
महजूर	४२
रसूल मीर	८६
अर्यनिमाल	१००
अब्दुल अहद आज़ाद	११९
महमूद गाँमी	१४१

इरादु

दीना नाथ नाँदिम

वुशुन वुशुन, व्वजुल व्वजुल, व्वजुल व्वजुल, वुशुन वुशुन
वुशुन व्वजुल, व्वजुल वुशुन छु खून म्योन
जवान छुस तुफान ह्यू जनून म्योन

मे शोक छुम वॅशीरि प्यठ फिदा गछुन तु जान द्युन
बु वाव छुस मे क्याह कर्यम यि आवलुन, यि आवलुन
मलख बॅनिथ पज़्या डलस अंदर बिहुन, खॅटिथ बिहुन
बनुन छु युप, दुशमनस छु द्युन लहुन, छु द्युन लहुन
तवय तवय वुशुन व्वजुल छु खून म्योन

बु शाद छुस करुन वतन आज़ाद छुम, आज़ाद छुम
वॅठ्युश वॅडिथ करुन चमन आबाद छुम, आबाद छुम
वदुन रिवुन पॅतिम ति वारु याद छुम मे याद छुम
नोवुय मे जोश छुम नोवुय इरादु छुम मुराद छुम
तवय तवय वुशुन व्वजुल छु खून म्योन

दजुन, दॅजिथ ग्रजुन मे कोर इशारु नारु वुजमलव
तलुक प्यठुक मे बोव सीर बेकरार ज़लज़लव
रगन मे खून बोर नोवुय, शॅहीद मज़ारु क्यव गुलव
शिहिन्य् व्वफुन मे होव, ज़्यव मे अँन्य् बहारु बुलबुलव
तवय तवय वुशुन व्वजुल छु खून म्योन

यँबरज़लन तु सुम्बलन, अँछन छु नोव खूमर ह्यू
गँरीब ग्रीस्तिस करान अँमीर ज़ारु पारु ह्यू
बुडिथ, व्वमेदुनय छु ल्वकचार, नोव बहार ह्यू

दिलस अंदर मे प्रोन वलवलाह छु बेकरार ह्यू
तवय तवय वुशुन व्वजुल छु खून म्योन

दज़ान छि म्यॉन्व वन, यियम करार क्याह, करार क्याह
रिवान छी म्यॉन्व गुल, यियम मे वार क्याह मे वार क्याह
बु कौंसलन तु फॉसलन ति प्रारु क्याह, बु प्रारु क्याह
तुलुन मे नार छुम, कर्यम मे नार क्याह, मे नार क्याह
तवय तवय वुशुन व्वजुल छु खून म्योन

इरादु छुम बु हावु यावनुक बहार आलुमस
बु सौंतु वावु पौठ्य करु जिगर निसार आलुमस
रंगन बु पनुनि खून, खारु म्वल बु वारु शबनमस
बॅनिथ बुन्युल तु नार करु बु लारु लार दुशमनस
तवय तवय वुशुन व्वजुल छु खून म्योन

★ ★ ★ ★ ★

बु ग्यवु नु अज़ दीना नाथ नाँदिम

बु ग्यवु नु अज़
गुलन तु बुलबुलन तु सुम्बलन तु मसवलन
हुंदुय खुमारु होत, तु मारु होत
मोदुर मोदुर तु नेंदरि होत, सु नगमु कांह
बु ग्यवु नु अज़ सु नगमु कांह
ति क्याज़ि अज़ ति क्याज़ि अज़
गुबारु गर्द जंगुची खटन छि रंग मसवलन
तु दुह्य बुशंगु जंगुकी चटान छि चोँठ बुलबुलन
तु सुम्बुलन अपॉर्य यपॉर्य गछान छ्वनिय छु हाँकुलन
तु वज़मलन बिहिथ अँछन छु ज़ाल ज़न
खँटिथ छि कोह तु बाल
तु कालु ओबुर संगरन वँलिथ छु नाल ज़न
बु ग्यवु नु अज़
तिक्याज़ि अज़ छि जंगबाज़ जालसाज़ होल गँडिथ
कँशीरि म्यानि ज़ाग ह्यथ

बु ग्यवु नु अज़
बु ग्यवु नु अज़, निशात, शालुमॉर, आबशारु लालुज़ारुकुय नर्म नर्म पिशुल पिशुल
तु सब्ज सब्ज शबनमुक सु नगमु कांह
ति क्याज़ि अज़, ति क्याज़ि अज़
बे वायि जायि जायि तापु क्रायि ज़न छि ज़ाग ह्यथ
करान छि आयि ग्रायि युथ चलन यि म्योन बाग ह्यथ
तवय छु शाह अँदुर्य गोमुत गुलन छि लालु दाग ह्यथ

ज्वयन छु गुंगुरायि प्यठ ति पँहरु ज़न
स्वतेयि कुकिलि वाह, तु ब्यूठ हारि वनुचि अँहरु ज़न
बु ग्यवु नु अज़
तिक्याज़ि अज़ छि जंगबाज़ जालसाज़ होल गँडिथ
कँशीरि म्यानि ज़ाग ह्यथ

बु ग्यवु नु अज़
बु ग्यवु नु नव बहारु बालु यारु के अमारु कुय रंगाबु रंग व्वज़ुल तु होर
न्यूल सबज़ तोत तु शोख नगमु कांह
बु ग्यवु नु अज़ सु नगमु कांह
ति क्याज़ि अज़, ति क्याज़ि अज़
बहारुसुय छि लार हर्दु वावु के ज़हारुची
वनन अंदर अवारु ताज़ु शूविया छि नारुची
सखर छि आदुमस ति आदमी सुंदे शिकारुची
यँबुरज़लन तवय टँपिस छि बनु गॉमुन्न
हवा छेनिथ प्योमुत, तु ही छी थरि बिचारि छ्यनु गँमुन्न

बु ग्यवु नु अज़
बु ग्यवु नु अज़ खाहन खलन तु डूरिनय
अंदर सु दांदु वॉल्य हॉल्य सुंद,
न्यंदन हुंदुय सु गुमु बँरिथ ति नगमु कांह
बु ग्यवु नु अज़ सु नगमु कांह
ति क्याज़ि अज़ तिक्याज़ि अज़
खाहन छु लावि न्याहलि लावि दावि जुव न्युमुत
खलन छु हालवन हुंदे यिनुक ति पॉरु ज़न प्योमुत
ड्यकन प्यठुय छू खोफु सुत्पु गुमु ज़न शिठिथ गोमुत
पला छु आवुलुन च्वपॉर्य गथ करान
तु गासु तान्यु क्रेट्यव, क्रेटिथ मूलु ज़न छु रथ हरान
बु ग्यवु नु अज़

तिक्व्याज़ि अज़ छि जंगबाज़ जालसाज़ होल गँडिथ
वँशीरि म्यानि ज़ाग ह्यथ

बु ग्यवु नु अज़, बु ग्यवु नु अज़
तौताम, यौताम नु
कोह तु बाल, खअह तु डूर्य, गुल तु पोश, ज़ग तु प्रोन,
कुमिर तु कुकिलि बोल बोश, हरुद तु सौत, वन तु बाग,
ज्वयि तु आब, ही ग्वलाब,
शालुमार, लालुज़ार, आबशार, नव बहार,
ज़ोजिबाल, बुरज़ुबाल, नंगुबाल, शीशिनाग, वावजन,
वारु कारु खोफु रोस्त, तु पँहरु रोस्त तु अँहरु रोस्त
बु बेयि वुछख
तु छिम्बरु मेलुवुन, सुली, सुली, सुली
इरादु म्यॉन्यु बेयि असन, लसन बसन
तु रथि खसन मुराद म्यॉन्यु
तु टोठ म्योन, नुंदुबोन, बाग सोन, योहय पनुन पनुन वतन
यि बेयि वुछन
आबाद, आज़ाद तु ख्वश यिवुन, बहार ह्यू, तु लोव ल्वकुचार ह्यू

बु ग्यवु तेली, बु ग्यवु तेली
तु सौंतु फुलयि मोत गँछिथ, बु ग्यवु तेली
नतु तौताम ग्यवु नु, ग्यवु नु ज़ांह
सु नैदरि होत, खुमारु होत, बु सोज़ कांह
तवय बु नेरु, अज़ बु नेरु, वथ बु शेरु
बँठ्य तु बेरु सँम्यु करख
बु नेरु तेज़ नौव कलम तु श्राख ह्यथ
तु दुशमनन तु रँहज़नन बु नेरु फेरु ठाख ह्यथ
ड्वकुर कलम तु द्रोत ह्यथ, इरादु वोत प्रोत ह्यथ
बु फेरु जायि जायि शायि शायि पनुनि आयि

प्रथ बलायि द्रोत ह्यथ, ड्वकुर कलम तु द्रोत ह्यथ
रुमव रुमव बु गुमु वॅडिथ, छलन यि टोठ बाग सोन
यि नुंदुबोन, बालुयार, ल्वकुचार, चोन म्योन
तु खोह तु खयि, ख्वड तु लयि, बु नूर सुत्य् पूरुवख
बु ग्यवु नु अज़
बु नेरु अज़, ड्वकुर कलम तु श्राख ह्यथ
इरादु अख बे बाक ह्यथ।

★ ★ ★ ★ ★

मे छम आश पगहुच दीना नाथ नाँदिम

(१)

मे छम आश पगहुच । पगाह शोलि दुनियाह ॥

द्वहस गाश हुरि गुल तु गुलज़ार प्रज़लन
ज़मीनस सुसर लागि तु सबज़ार प्रज़लन ।
वछस मंज़ हुमिस लोलु फंवार प्रज़लन
पगाह शोलि दुनियाह ॥

कज़ुल लागुनय मे गछन अँछ कज़ॉली
वस्यम द्वद तु बबि टेंड्य गछन मे व्वज़ॉली ।
तु दहि वुहुर्य दशहार यियि सोन साँली
पगाह शोलि दुनियाह ॥

कनन गछि मे चां म्यां च़ल्यम वुय तु वायि
वछस तल मे च़ेह च़ेह कर्यम आयि ग्रायि ।
लबन लोसु कुठिसुय खस्यम मूलु मायि
पगाह शोलि दुनियाह ॥

हु बर च़ुरनि तँल्य कन थँविथ बोज़ि लोत लोत
तु थँज़ कॉर थॉविथ सु बेयि नेरि पोत पोत ।
तु वनुवुन ह्यमस पोत्रु माँलिस यि सोत सोत
पगाह शोलि दुनियाह ॥

यिनाम सँदरु पनुन्यय वदव छय मुबारक
बु छस पोत्रु माँज छँत्रु बून्यु फिकरि तारख ।

ह्यमख क्वछि ह्यवुन्य अज बु मा केह ति प्रारख
पगाह शोलि दुनियाह ।।

दपान जंग छु व्वथुवुन, पगाह गोछ नु सपदुन ।
पगाह शोलि दुनियाह, पगाह गोछ नु सपदुन ।।

(२)

मे छम आश पगहुच । पगाह वादु छुम तस ।।

बु दूह लोसुन्यन ह्यू थरन छायि प्रारस
तु हीमाल ज़न लोलु तय मायि प्रारस ।
गछ्यस चेर गम क्याह छु बे वायि प्रारस
पगाह वादु छुम तस ।।

सु यियि मायि मोत छायि होल ग्रायि मारान
बु आसय तँमिस मालि कित्य पोश चारान ।
कर्यम कथ बु रोशस तु छू लागि इशारन
पगाह वादु छुम तस ।।

स्यठाह ह्वंगनि रँट्यतन बु थवु कॉर ब्वन कुन
तु येलि दँल्य रट्यम तेलि वुछस अदु अँछन कुन ।
रट्यम नालु ।दु ओश दरुन मा छु मुमकिन
पगाह वादु छुम तस ।।

थँविथ कॉर क्वछि मंज दिलुक्य दौद्य बावस
तु र्वपु सीनु किय दाग नज़रानु थावस ।
प्रुछस बु च़े कवु लॉज्यथस लोलु दावस
पगाह वादु छुम तस ।।

वन्यम द्वह छि नॅजदीख छोह मारि यावुन
छु नॅन्य् पॉठ्य असि लोल हावुन तु बावुन ।
पॅत्युम पथ छु त्रावुन तु नोव नेछनावुन
पगाह वादु छुम तस ॥

दपान जंग छु व्वथुवुन, पगाह गोछ नु सापदुन ।
पगाह वादु छुम तस, पगाह गोछ नु सपदुन ॥

(३)

मे छम आश पगहुच । शुर्यन मोल वात्यम ॥

युथुय बोज़ आलव, त्युथुय ब्रोंटु नेरस
रटन नालु मति ज़ोर, अँद्य अँद्य बु फेरस ।
नॅविस ताज़ु गासस प्यटुय जाय शेरस
शुर्यन मोल वात्यम ॥

थॅकिथ आसि आमुत, ग्वडॅन्य् पाद नावस
तु म्वठ दोग दिवान वॅल्य् वॅली नॅदुर पावस ।
तु नखु चिय गठुर ब्रोंह कनिय नज़रि थावस
शुर्यन मोल वात्यम ॥

गठुरि मंज़ नॅवी गुल तु गुलज़ार आसन
मे छिठ जानि कनु वाजि तूमार आसन ।
हॅबीबस खतनहॉज कित्य् द्यार आसन
शुर्यन मोल वात्यम ॥

यिवुन्य् ईज़ कित्य् अँस्य् पलव नॅव्य् बनावव

तु कचि पूत्य् जोराह ति क्वरबान थावव ।
हबस च्चाटुबाजन शिरीन्य् बॉगुरावव
शुर्यन मोल वात्यम ॥

दपान जंग छु व्वथुवुन, पगाह गोछ नु सापदुन ।
शुर्यन मोल वात्यम, पगाह गोछ नु सपदुन ॥

★ ★ ★ ★ ★

ज़ून खँच़ च़ोट हिश

दीना नाथ नाँदिम

दुहु अकि कोहु पँत्य् ज़ून खँच़ च़ोट हिश
नालस छेनिमुच़ु तनि वछ़ु त्राँविथ
रवु तनि हनि हनि दाग नँनिराँविथ
पनु पनु गॉमुच़ पोम्पूर्य पोट हिश
ज़ून खँच़ च़ोट हिश, थँच़मुच़ गोट हिश
ज़न मोज़ुरेनि कस ताम च़ँलुराँविथ
टेकुदरन अँक्य् थँव पुशिराँविथ
फुटुवाँटिस सुत्य् र्वपुयाह खोट हिश
ज़ून खँच़ च़ोट हिश, ब्वछि लँज बालन
ओबरन ह्यँच़ बेयि गँज छ्यवुरावुन्य्
वनु विगिन्यव प्योव ज़न व्वथु दानस
बतु कुल्य् ज़न खँत्य् संगरमालन
मे ति ह्यँच़ फाकु पँरिस शेछ बावुन्य्
अँछ फिर्य् फिर्य् वुछ मे ति असमानस

★ ★ ★ ★ ★

ल्वकचि छु लखचुन दीना नाथ नाँदिम

ल्वकचि छु लखचुन
बुमि हुंज़ि सुमि तल
सिरिं प्रज़लवुन
ज़न नाँग्यरायस
यारि अँकिस तल
मनक़ छु मौठमुत
बलपूरिस छारान हीमाल
नतु आसमानस र्वनि दामानस
ओबरस क्वछि क्यथ संगरमाल

ल्वकचि छु लखचुन
ह्वंजि हुंज़ि लंजि प्यठ
म्वख्तु प्रज़लवुन
ज़न मजलूनस नजदु वनस मंज़
खाब छु आमुत
लॉल छि प्रारान ठरि दिथ बाल
नतु ज़न रॉन्न छु बुथि प्यठ तुलमुत
शबनम तथ छु बन्योमुत खाल

ल्वकचि छु लखचुन
ड्यक़ कुय टिक़ ज़न
ताफ़ प्रज़लवुन
संगल दीपचि र्वनि पदमॉनी
प्रागाशन ड्यक़ म्यूठ छू द्युतमुत
नूर जहाना हूर मिसाल

नतु ज़न हरनन क्वलु सरस कुन
वनु प्यठु नीमुच छयफ दिथ छाल

ल्वकचि छु लखचुन
अथ छुनु म्वलुवुन
लाल प्रज़लवुन
गुलि लालस ज़न
छ्वकुलद वछुकुय
दाग व्वजुम ह्योत
दकुलद ज़ूनि
गाशस गटु हिश नॉली नाल
नतु शफकन वॅर शामुचि छायि
कपटिथ पॅतर्यन बिंदर्यन माल

ल्वकचि छु लखचुन
हंगु तलुकनि कुय
दूर प्रज़लवुन
हरम्वखु प्यठुची
प्रेन्यु शीनुमाने
वुज़मलि ज़न वुन्यु
बोसु छु कोरमुत
बौबुरस प्रारान स्वंदरमाल
नतु ज़न वनु सुय मंज़ सीताये
अॅश डल आमुत मालामाल

ल्वकचि छु लखचुन
शाह रगि ह्योर कुन
लोल प्रज़लवुन
ज़न देदि म्याने
वछु तलु रोछमुत
म्वनि फोल अॅछ हुंद
छेनि मोहबतु सुत्यु औनमुत माल

नतु अकि गॅर्यबेनि कनु मंजु चौरिथ
फलि फलि तुजमुच्च लेजि किच्च चाल।

★ ★ ★ ★ ★

गुलि लालु अमीन कॉमिल

गुलि लालु फोलिथ आय वनन मंज़ तु डलन मंज़
प्यव शोहरु च्चवापर्य यि बागन तु खलन मंज़
कुमिरन तु जलन मंज़

कोर जूल यि ज़न मागु बँचिथ सोंतु बहारन
द्युत आशकव रंग यावनुक ज़न लोलु अमारन
बेताब इशारन

गुलि लालु ज़न मस प्यालु बँरिथ थोवमुत कलुवाँल्यु
या ग्रीस्यु कँटाह लोछ व्वजुल नार छुनिथ नॉल्यु
या शोलुवुन्यु मशॉल्यु

ज़न डूल्यु अअददच कोरि मॉलिस कहारनुय हुंदि दँस्यु
या टोपि हन वति प्यठ व्वजुज पेमुच छि शुरिस वँस्यु
वातुन्यु यि गँछ बेयि तँस्यु

चथ जामि शहादत छु ज़न शरवाँन्यु सु वलुवीर
हँज्यानि वुछिथ अंज़िनि होटा ज़न छु रसुल मीर
पुर जोश दुआगीर

ज़न माहरेन्या व्वशलेमचुय डीशिथ पनुन खावंद
या बॉज्यगारन नारु रेह कँरमुच छि नज़रबंद
या लालि समरकंद
ज़न कार्तिकुची ज़ुनि बुथिस प्यठ छु सियाह खाल

★ ★ ★ ★ ★

शब गर्द वासुदेव रेह

माने बूज़िव यिमन कलामन होशा होश
आलव म्योन यि शामन शामन होशा होश
दाय मे यी द्युन खासन आमन होशा होश
आलव म्योन यि शामन शामन होशा होश

हे वुछ साँ म्याँन्य बेदोरी आँखुर मा त्वहि तार दियव
पथ ब्रोंह वुछिनय नैदुर अगर त्राँविव थपलिस मा आर यियव
वुमरि सौँबरोवमुत राविवु रछ खंड काँसि अगर व्यस्तार यियव
हे वुनि मा छि कॅमी बदनामन होशा होश
आलव म्योन यि शामन शामन होशा होश

म्योन सदा गव खॉलिस बायव होश हबा हुशयार हबा
यथ समसारस नाहमवारस चारु दिनस छुनु तार हबा
क्याज़ि रछुन आराम छु तवु किन्वु आरामस छुनु वार हबा
युथ नु ह्यमॅच हुंद त्राँविव दामन होशा होश
आलव म्योन यि शामन शामन होशा होश

यिनु साँ आलव म्योन गछिवु कॅन्य पॅत्य तु यि बूज़िथ मॅशिरॉविव
यिनु पनुन अँज्युक या पगहुक साँचुन बेयिनुय प्यठ त्राँविव
यिनु सँन्य चूरस दीनस दर्मस द्रियन तु कसमन कन थॉविव
म्वखसर थँविज़ि नज़र अंजामन होशा होश
आलव म्योन यि शामन शामन होशा होश

यिनु कनु दोल दियिव क्रख बूज़िथ राय गछ्यव असि क्या साँ हे
यिनु ज़ॉनिव यि छु पर आलव अँस्य पान रछव असि क्या साँ हे
यामथ कांह गछि नाराह दिथ, यिनु त्वहि बास्यव असि क्या साँ हे

म्यॉन्य् यॅहय क्रख शाहरन गामन होशा होश
आलव म्योन यि शामन शामन होशा होश

ज़रि हना वख कूठ हसॉ वुछ सॉ तामथ क्याह करि इनसान
वुछ सॉ यी मा रोज़ि दूहय यि छु दोराह अथ क्याह करि इनसान
थफ थवस हेयि पथ पानय सोंत सोंत, न्यथ रोज़्या कथ, क्याह करि इनसान
बायव होश यिमन अयामन होशा होश
आलव म्योन यि शामन शामन होशा होश

बाहरॉल ती शुर्य ह्वकू ची ची यिनु यारो मिसमार गछिवु
नालु रॅट्चून यि योवुन, वख यिनु अथु मंज़ु राविवु, फ्यार गछिवु
सर्फस बीन गछिवु यिनु पर क्रख, नाहकु युथ नु करार गछिवु
यिनु रेह ज़ालिवु माहरेन्य् खाबन होशा होश
आलव म्योन यि शामन शामन होशा होश

★ ★ ★ ★ ★

जाय कत्यो छय

वहाब खार

छम चॉन्य् स्यठाह माय मत्यो
जाय कत्यो छय
दूरन चु मो मार ग्राय मत्यो
जाय कत्यो छय

येति ना दरनपाय मत्यो
सरन सब्जी छय
काचु जूनि कासतम ग्राय मत्यो
जाय कत्यो छय

ड्यकस मंज़ छय जाय मत्यो
स्वय मे लेखनय छय
तिम छी र्फ डाय मत्यो
जाय कत्यो छय

ग्वनाह तु सवाब आय मत्यो
त्रकरि तोल्यम दय
तथ कोरकुन लागि ग्राय मत्यो
जाय कत्यो छय

कम कम सुलैमान आय मत्यो
कति हातिम तय
दोराह कॅरिथ द्राय मत्यो
जाय कत्यो छय

यिम येमि बवुसरु द्राय मत्यो
तिम नु फीरिथ आय
अब्दुल वहाबस राय मत्यो
जाय कत्यो छय
★ ★ ★ ★ ★

वलु गूर करॉयो

वाज़ु महमूद

हा जानि अँज़ीज़ो, वलु गूर करॉयो
मति लाल जराँयो, वलु गूर करॉयो
पनुन्यव तु परायव, दोस्तव तु रँफीकव
बनुनस ति ग्यूलहमो, वलु गूर करॉयो
मजनून खोत नजदस, लॉल चायि मज़ारस
लॉलि हुंदि मजनूनो, वलु गूर करॉयो
थरि हुंदि ग्वलाबो, कथ वारि फोलुहमो
मुशिक चानि बलाँयो, वलु गूर करॉयो
हा म्यानि अज़ॉलो, वनुयो बु गज़ॉलो
जामु गव मे कज़ॉलो, वलु गूर करॉयो
रवपु र्वनि अंज़ोलुय, श्र्वनि दार मंज़ोलुय
चंद्रनुक बु गराँयो, वलु गूर करॉयो
कस वनु यि क्याह गोम, हियु यावनस डोठ प्योम
ती ना बु जराँयो, वलु गूर करॉयो
आम अँशुकुन दूलाब, सँर्य पेठ्य गोम सँहलाब
कमि तारु तराँयो, वलु गूर करॉयो
सोदा मे कर्यामो, मूलस ति छ्वन्यामो
तूलस बु क्या दिमुयो, वलु गूर करॉयो
शाहबाज़ अयाज़ो, वन महमुद्य वाज़ो
शाहनामु पराँयो, वलु गूर करॉयो

★ ★ ★ ★ ★

गज़ल

वाज़ु महमूद

खबर क्याह मेँ ऑसुम सु दिलदार रावे
कॅरिथ खश मेँ थावे सु बे आर त्रावे
स्यठाह काल वोतुम करान इन्तिज़ॉरी
सु अज़ पगाह वाति तय हाल बावे
बदल तथ मेँ द्युतनम, दगा त्युथ मेँ कोरनम
यि ल्वक़ुचार म्योनुय कॅरिथ गव सु ज़ाये
मेँ छिम दादि तँहुंदे व्वथान क्रॉर्य ज़ख़मन
बलन दॉद्य सॉरी सु लरि पान सावे
बु देवानु कोरमुत तँहुंद्य हुस्ने नाज़न
ओडुय रोय हॉविथ थवन क्याज़ि छ़ाये
य्वहय छुम दिलस मंज़ तमन्ना मेँ चोनुय
यिमन दीदनुय मंज़ करस ना बु जाये
छु महमूद गोलमुत दर फिकरि दिलबर
ललवान दिलस मंज़ ज़न तिलु क्राये

★ ★ ★ ★ ★

शखदारी

लालु लॅक्षमन

बॉश दूह बरनि प्यठु बेयि बटुवारे
लालु लॅक्षमन शखदारे द्राव
थाल तय बोहगुन तुलुन अटुबारे
लालु लॅक्षमन शखदारे द्राव

ग्रुहदिस तु ग्रहचारस गॅयि मिलवन
सतरंजि फरदाह गिलवन द्राव
होछिमुच्च गुर्य खॅट ऑसुस सवारे
लालु लॅक्षमन शखदारे द्राव

दूह अकि लालु जू फोट अॅकिस गमनस
दाह मोहनिव्य तस लमुनस लॅग्य
दरु दरु दीवान वर लोगुस कारे
लालु लॅक्षमन शखदारे द्राव

दूह अकि काकस आफताब रामस
बागवथ वोनुमस शामस ताम
द्यव दियि बतु म्योड यियि व्यन्नारे
लालु लॅक्षमन शखदारे द्राव

शामन वोनुनम वॉराग ओनुथम
बतु मैडि बापथ वोनुथम वीद
अॅस्य न साँ ज्ञानोय यिमु ज्ञासकारे
लालु लॅक्षमन शखदारे द्राव

बुडाह अख ऑसुय आमुच्च तु गॉमुच्च
मरनु दादि ऑसुय दूदरेमुच्च
क्रोछ ह्यथ आयम चोकु मंजु लारे
लालु लॅक्षमन शखदारे द्राव

★ ★ ★ ★ ★

बाकयात

लालु लॅक्षमन

वनय बोज़ ताज़ु अहवाल, ज़मानुक हाल वेसिये
अन्यन आर्डर छु परनस, मुलाखत काँन्य करनस
ज़र्यन बोज़ुन छु फॅरियाद, यि बेदाद बोज़ वेसिये

★ ★ ★

खॅरीदारस द्रवजर मार, व्वज़ुम वॉनिस करन खार
अयाल बारस समावार, करन लाचार वेसिये

★ ★ ★ ★ ★

गाडु द्यगुल लालु लक्ष्मन

दपन अख खानुदाराह दारि प्यठ ओस
करन आशेनि कुन तकसीर सुय ओस
छि जँन्य जोराह खबर सोनुय पकन मा
दु शरतस प्यठ खबर छा येत्य् ड्वकन मा
बरन राथाह करन चुंठाह तु चासाह
वुरुन वथरुन मंगन त्रावन लम्बासाह
सलाह छुम यी प्यवन व्यवहार त्यागुन
कलस लेफाह वलुन्य, बेमार लागुन

वँछुस आशेन्य् च्छु छुख देवानु गोमुत
रोटुख मा हुर्य यछन, ज़न छुख मत्योमुत
रनन वाजेन्य् बु छस बुय लागु बेमार
च्छु बेह रूशिथ मे कुन कर ज़ार तय पार
वनुन यी गछि मे कोताह खोत यि इलज़ाम
मे खँड्य फुट्य कर्म काँत्याह ऑस्य् अज़ ताम
हतय थोद व्वथ दोदुस चाने फिराकय
कँरिथ दिम कोम च़ोटाह, मूदुस बु फाकय
लदुन सूराह वदुन गछि बाकि सुती
शुर्यन अपज़ुय जिगर छ्योन फाक सुती
यि कथ यामथ पछ्यन वाती कनस मंज़
दपन येति नेरुवय, सोँचन मनस मंज़

यँहय कथ पास गँयि, म्यंगन द्युतुन चार
हेचुन लेफाह वुरुन्य् तमि लोग बेमार
बुछिव प्रालब योतामथ शाम सपनुन
नेँसीबन लॉग्य् तिहँदिस आंगुनस कुन

वॅरुख क्रख खानुदारव स्वर्ग नीतव
मुसॉफिर आयि रातस जाय दीतव

सदा बूज़िथ कनन गव खानुदारस
दिच्चन क्रख वोथ बे बूजाह यथ शहारस
मरन छम खानुदारेन्य, खानु वॉरान
पकन गुर्य हिव्य् गॅमुत्य् छिवु हालि हॉरान
वुछिव तॉजिब कथाह अॅल्य् अॅल्य् छि खॅत्य्मुत्य्
पखर पोरिक्य् हखर ज़न नीरि वॅथ्मुत्य्
शॉगुन आसुन छु येति फ्युरुन पछ्यन डाख
मुदथ गोमुत छु ब्राद्योमुत बिदथ ब्याख
ग्वडुन्य् ऑबाह गरस सॉनिस दरीं वख
बॅदुर नूजाह छे चमरेमुन्न स्यठाह सख
बुथिस नॅहवन छे नस मारन छे तछ तछ
नॅदुर यामथ प्यवन, व्वपरस कडन अॅछ
गगर ज़ाथाह नवेमुन्न यथ इहातस
स्यठाह सख्खी अनन तिम रॉत्य् रातस
व्वपर डींशिथ गछन गगरन सितेज़य
व्वपर पलवस करन तिम रेज़ु रेज़य
पगाह ऑसिव खरस खारन, वनन दॉद्य
अखाह आस्यम मे फॉसुल्य्, ब्याख फॉरियोद्य
गॅछिव बायव वॅरिव बरदाश खॉरी
सफॉयी जान गॅयि अज़ खर सवॉरी

ति बूज़िथ गुल्य् गॅडिथ वोन खानुदारस
सपुन ख्वफतन, ज़रा सा गछ व्यन्नारस
करव अॅस्य् चारु त्रोपुरावव गगर वाल
गगर छल ह्यथ छि ब्वखचस क्यथ, मु दुन ज़ाल
वनय कोताह महातम मागु मासुक
गॅरीबन प्यठ योहय छुय डाडु पासुक

चे क्वाह छुय राह वोलुख पापव च्चु सान्यव
खबर छय ना यि क्वाह वोनमुत छु प्रान्यव
अगर कांह च्चुनि बोकाह अज्ज दियि दानस
बु छुस ज्ञानन जि तस खारन व्यमानस

ति बूजिथ खानुदारस वोथ दिलस ताव
दिचुन अदु कूठराह अख, आर तस आव
शिकस कूठुर बॅरिथ वुछ सूर सासय
ज्जु गज्ज खॅत्यमुत्य् तथ अंदर लछ तु गासय
थॅविख बर दिथ तथ अंदर, ऑस्य् दर्द मंद
थॅविख पॅश हिव्य् कॅरिथ गानस अंदर बंद

मे कॅर काँमाह तिहिँदि करतूतची व्वन्य्
वुछुम पाँपी अँछव बरुचव लुयव किन्य्
पेमुच्च गाँमुच्च बटन्य् वॅछ, होल गाँडुन सख
दोपुन रुनिस च्चु थोद व्वथ, च्चेर गव वख
तुजिन मलराह तु पानस द्रायि लारान
वनस मंज्ज रूस्य् कॅट ज्ञन छालु मारान
तॅलिन गाडस त्रे मन म्वकल्योस माँलाह
छॅलिन तोमुलस त्रे मन अज्ज जिन्सि ऑलाह
दोपुन ज्ञांह यिछ जि्याफत छम नु रॅनिमुच्च
अजायिब गाडु ज्ञाथाह अज्ज छे अँनिमुच्च
तम्बुरि हुँदुय च्चव्यर लागख फिरख डाख
बगारुक रस करख रातस दिमख पाख
रॅनिथ क्वाह काँम कॅर तॅम्य् खानु दारन
फिरिन नॅर्य गव सु पानय छालु मारन
कॅरिन तथ बाँटु प्रथ बाँचस कमो पेश
ख्यमव पांचन दूहन तामथ करव ऑश

वोथुख ज्युठ ह्यू, कॅडिन ज़ेवि दॅह पंदाह टास
थॅदी छिस मर्चवांगन, छम यिवन चास
मगर बूजुम यिमय गॅयि मर्चवांगन
वसुन गछि प्युंन, दगि व्वज़लनुय गछन कन
कथाह बाथाह कॅरिथ ख्यथ चथ खोतुख कॅफ
दोपुख त्रावव नॅदुर प्यठ कुन ह्यमव लेफ

मे कोड आलव तिमन तोहि क्युत छु दरजाथ
शंगव ना अॅथ्य वोटिस अंदर कडव राथ
यि कथ बूज़िथ तिमव पॅहरा सलाह कोर
दोपुख अदु क्याह वॅलिव, बेहतर स्यठाह च़ोर
योतामथ शुर्य तु बॅड्य तिम द्रायि पानय
सपुन्य सॉरी कुठचन अंदर रवानय
योतामथ तिम सपुन्य परि लूक वॉसी
तोतामथ अॅस्य ति अपज़े नॅदरि ऑसी
शिकस कुठरे अॅदुर नेरुन सलाह ज़ोन
टुखुय अॅन्य, अॅथ्य कुठिस अंदर कदम च़ोन
च़ोलुम ग्रहचार फ्यूरुम फ़ूस ताले
वुछुम क्याह गाडु द्यगुलाह पुर मताले
वुछुम बतु दीचि रोनुमुत ज़न छु कोफ़ूर
फ्यूरुम ब्वखचस तु दीचस थोवमख सूर
न्यबर नीरिथ दोपुम दोयिमिस ह्यसस फेर
यि तुल पॅत्य किन्य, टुखुय तुल, व्वथ चलव नेर

दुपहर यामथ सपुन द्यगुलिस मुचुर गोल
वनय क्याह गाडु ख्यथ कोताह जिगर फोल
नज़र दिच़ वुछ बटाह लारन तु थारन
द्यकस प्यठ च़ंजि लायन पान मारन
अॅछव किन्य खून हारन कमि हालय
तमॉमी दॉर खुंज़मुच़ वालु वालय
दिच़न क्रख रॅहज़नव तोह्य छिवु बे परवाय

धर्म ज्यूनूम पछ्यन रातस दिच्चुम जाय
वुछिव बा हे यिमन कर ज़ांह ति पूरे
खदायाह गाडु द्यगलुय न्यूख चूरे
नेंदुरि वेंथिथुय बु यामथ च्नास लंगरखान
वुछुम तति सूरु सासय, ज़न गोमुत फान
यि बूज़िथ रोट पछ्यव, कोरुहस मुकालय
सु खर लोट दौर खंज़ुहस वालु वालय

★ ★ ★ ★ ★

वलो म्यानि पोशे मदनो

हब्बु खोतून

दिल निथ रँटिथम गोशे ।
वलो म्यानि पोशे मदनो ॥

वलु वेस्य् गछवय हंदे
लान्युन न्याय कति अंदे ।
लुकु मँत्य् कँडनस रंदे
वलो म्यानि पोशे मदनो ॥

वलु वेस्य् गछवय बबरे
छ्वख मै लोयिनम तबरे ।
कांछा सूज़नम नु खबरे
वलो म्यानि पोशे मदनो ॥

वलु वेस्य् गछवय शॉद्य पोर
वायिनि त्रावस हाँज़ चोर ।
सँदि वानि छलुसय अथु खोर
वलो म्यानि पोशे मदनो ॥

वलु वेस्य् गछवय हिये
युस मरि सु कति यिये ।
प्रारान छस बु चानि ज़िये
वलो म्यानि पोशे मदनो ॥

वलु वेस्य् गछवय आबस
दुनिया छु नैदरि तु खाबस ।

प्रारान छसयो जवाबस
वलो म्यानि पोशे मदनो ।।

वलु वेस्य् गछवय क्रेछे
लुकु मॅत्त् तुजनस रेछे ।
तिमन ते म्योन ह्यू गछे
वलो म्यानि पोशे मदनो ।।

वलु वेस्य् गछवय वन तय
लूकव बॅर्यहस कन तय ।
ती बूज़ तॅम्प सादन तय
वलो म्यानि पोशे मदनो ।।

वलु वेस्य् वसुवय ब्वन तय
कनु कुय दिमुसय स्वन तय ।
स्वन म्योन दून मोहरन तय
वलो म्यानि पोशे मदनो ।।

वलु अज़ दुय त्राव म्यॉनी
छम मनु कामन चॉनी ।
ऑखुर छु दुनिया फॉनी
वलो म्यानि पोशे मदनो ।।

अफताब छारान जूने
लान्यन छु वालान वोने ।
वोन इशारा हब्बु खोतूने
वलो म्यानि पोशे मदनो ।।

★ ★ ★ ★ ★

गाह चोन प्यवान गटि

हब्बा खोतून

गाह चोन प्यवान गटि । अकि लटि यिहम ना ॥

यावन म्यानि किरमिज़ पाक्कम्यू वानु रंगनय आख ।
मे नो ज़ोन ऑथुर च़टि, अकि लटि यिहम ना ॥

आबस बो वॅछुस गटि, नोट मोटुमो यारुबल ।
विज़रु वावु नोट मा फटि, अकि लटि यिहम ना ॥

हूर लॉल द्रायस गटि, चूरु बाय प्योमो नाव ।
स्वनु कन तु लॅदरु हटि, अकि लटि यिहम ना ॥

यार म्योन छु जमालटि, कमाल तस छुम नाव ।
सु छुम तति बु कस मटि, अकि लटि यिहम ना ॥

यान्ज येलि यारज़ च़टि, मोहबत नु रोज़ान सोर ।
यारु दादि वॉलिंज फटि, अकि लटि यिहम ना ॥

★ ★ ★ ★ ★

काँसि मो राँविन शूरे पान

हब्बा खोतून

तुलुव नार छुम ललुवुन मूरे ।
काँसि मो राँविन शूरे पान ॥

मॉल्य् माजि रँछनस कंदु कोस्तूरे
दूदु सुत्य् आँसिम तन नावान ।
सुय पान लोगमाह रह मुसाफूरे
काँसि मो राँविन शूरे पान ॥

मॉल्य् माजि रँछनस लोलु क्या वूरे
सासु बजु च्वंजु आसम सुलुवान ।
मे नो ज़ान्योव लगु येमि खूरे
काँसि मो राँविन शूरे पान ॥

मॉल्य् माजि त्राँवनस सबकस दूरे
औखुनन वोलुनम मूरे पान ।
आरु रोस्य् तुलिनम नारु त्यम्बूरे
काँसि मो राँविन शूरे पान ॥

मॉल्य् माजि हरशायस येलि दूरे
पतु पतु द्रायम व्यसु वनवान ।
होलु गोम अँदरी लोलु तालूरे
काँसि मो राँविन शूरे पान ॥

मॉल्य् माजि वोनुनम ड्यकु बँड कूरे
वाँरिव आंगनु छिय प्रारान ।

रंगु डोलि आसम र्वपु कौदूरे
काँसि मो रॉविन शूरे पान ॥

बु छसय येति तय च्नु छहम दूरे
दूशवय द्राये जॉनी जान ।
मे नो ज्ञान्योव लोदमुत लूरे
काँसि मो रॉविन शूरे पान ॥

दय नय दियि तय ड्यकु नय पूरे
वयमुच आस्या काँसि पोशान ।
म्वय चव हबु खोतूनि टूरि टूरे
काँसि मो रॉविन शूरे पान ॥

★ ★ ★ ★ ★

वॉरिव्यन सुत्तु वारु छस नो हब्बा खोतून

वॉरिव्यन सुत्तु वारु छस नो ।
चारु कर म्योन मालिन्यो हो ॥

गरि बु द्रायस आबु नॅटिस
नोट मे फुटमो मालिन्यो हो ।
या तु दीतव नटि नोटाह
नतु नटिचे हारु मालिन्यो ॥

शुर्य पानस सिंदुर गॅयिमो
बुडुर खसुन कुडुर प्योम ।
कतुर छारान कतुर सॅनिमो
वेतरि नून प्योम मालिन्यो हो ॥

हशि लॉयिनम टॅपिसुय थफ
सुय मे गोमो मोतु खोतु सख ।
यँदरु पचि प्यठ नॅदुर पेयिमो
चॅषुर फुटमो मालिन्यो हो ॥

यारु दादे तारु गॅयिसो
बारु बुख छुम आमतुय ।
हबु खोतूनि वोन इशारा
दिल हुशारा मालिन्यो हो ॥

★ ★ ★ ★ ★

छाव म्याँन्य् दौनय पोश

हब्बा खोतून

मे कॅर्य च़ेय कित्त् पोशि दसवानय ।
छाव म्याँन्य् दौनय पोश ॥

बुँसय ज़मीन, चुँख असमानय
सीरस छुख सरपोश ।
बु छसय न्यामथ, च़ु छुख मेज़मानय
छाव म्याँन्य् दौनय पोश ॥

लॉले गटि मंज़ च़ोंग ज़ाजानय
बाले रूदुस नु होश ।
च़ु छुहम शमा, बु छस परवानय
छाव म्याँन्य् दौनय पोश ॥

रछि रछि रयतकोल छुम सोरानय
बरु मा गछन अछि पोश ।
कुनि हितु बुलबुलु यितु अकि आनय
छाव म्याँन्य् दौनय पोश ॥

बॅरगु तीर ऑसुस प्यठ दरीचि खानय
रूदुम ति ना ज़र जोश ।
अदु यिख येलि बाल सोर पानु हानय
छाव म्याँन्य् दौनय पोश ॥

बम तय ज़िलु छिस सोज़ वायानय
विलु नुय थोवथम नु गोश ।

कम क्या गोयो येमि म्यानि वानय
छाव म्याँन्य् दौनय पोश ॥

रंगु रंगु थुर्य अम्य क्रालन बानय
ब्योन ब्योन कोरनख नकूश ।
कैह द्रायि हँल्य् वँल्य्, कैह जानानय
छाव म्याँन्य् दौनय पोश ॥

चौरिथ अँनिमय फंबु मोयानय
जानानु मे मो रोश ।
हबु खोतूनि रूदुम अरमानय
छाव म्याँन्य् दौनय पोश ॥

★ ★ ★ ★ ★

त्रे क्योहो गॅयी म्यॉन्य् दुय

हब्बा खोतून

चु कम्पू स्वनि म्यानि ब्रम दिथ न्यूनखो
त्रे क्योहो गॅयी म्यॉन्य् दुय ।
चख त्राव दुय मलालु व्दु छुय ना यिवान
त्रे क्योहो गॅयी म्यॉन्य् दुय ॥

न्यस्फ रातन बर वॅथ्य् त्रॉविमय
साथा यिख ना चुय ।
फेरु छुनु कैह ति फेर छुख पावान
त्रे क्योहो गॅयी म्यॉन्य् दुय ॥

मदन वारो बदन ज़ोलथम
गोछुहम मे आदन चुय ।
बादाम चेशमव खून छसया हारान
त्रे क्योहो गॅयी म्यॉन्य् दुय ॥

श्रावुन शीन ज़न बु गलान आयस
बागस फोजिस बु ही ।
चोनुय बाग तय चुय वलो छावान
त्रे क्योहो गॅयी म्यॉन्य् दुय ॥

ज्वलु छम ना यिवान म्वलु छुख वालान
गम छुम वॉलिंजि सुय ।
जांह छुख नु दोदमुत सीनु शेहलावान
त्रे क्योहो गॅयी म्यॉन्य् दुय ॥

छारान लूसुस कोहन तु बालन
सोरान आम बालि द्यन ।
राह क्याह लोदथम कोनु छिहम माज़ान
त्रे क्योहो गँयी म्यॉन्य् दुय ॥

तन छस नावान जामु छस पॉरान
हावान छसया चॉन्य् दृय ।
पनुनिस पानस ग्रायि छुखा मारान
त्रे क्योहो गँयी म्यॉन्य् दुय ॥

ओश छस त्रावान बु च़ालि च़ाले
मे बालि गोछृहम च़य ।
च़ु कवो वति म्यानि आख मँशरावान
त्रे क्योहो गँयी म्यॉन्य् दुय ॥

हबु खोतून छय अरमान ख्यवान
कँरमय नु ज़ांह बंदुगी ।
यावुन रोवमुत छुम याद यिवान
त्रे क्योहो गँयी म्यॉन्य् दुय ॥

★ ★ ★ ★ ★

पोशे मति जानानो

महजूर

चोलहमा रोशे रोशे । पोशे मति जानानो ॥

अँती अँती रोजतो यारो, कोत चोलुख जोदूगारो ।
ग्वडु कर म्योनुय चारो, पोशे मति जानानो ॥

बुछमखा दूरे दूरे, सनु गोम स्वर्गचि हूरे ।
इस वदान चूरे चूरे, पोशे मति जानानो ॥

बाल प्यठ बाल छस प्रारान, अशि कनि खून छस हारान ।
यारस मार मटि खारान, पोशे मति जानानो ॥

अँशकन कँरुस बदनामो, क्रख गँयि शहरु तु गामो ।
पितरेन्य छम दिवान पामो, पोशे मति जानानो ॥

छस वदान पँत्यमे प्यारे, मारुमँत्य दिल कोरुम तारे ।
तोति मे रूदुम हारे, पोशे मति जानानो ॥

वलु वेस्य् गछुवय कामे, यॉर्य हय कँरनस थामे ।
गॉजिनस तु लॉजिनस पामे, पोशे मति जानानो ॥

वलु वेस्य् गछुवय वन तय, तस कँम्य् बँरिनम कन तय ।
कर सना बेयि डेशन तय, पोशे मति जानानो ॥

यिखना हालि दिल बावय, दोदुमुत सीनु हा हावय ।
तेलि यिखा येलि बो रावय, पोशे मति जानानो ॥

कसू निशि शेछ बो थावय, कसू अथि सोज़य ग्रावय ।
रोशि यितु पोश वथुरावय, पोशे मति जानानो ॥

असुवुनि हा ख्वशबाशे, लॉजिथस कथू वालु वाशे ।
वॉलिंजि करिथम काशे, पोशे मति जानानो ॥

च़ोलुहमा रोगे रोगे, सँन्यास लागय जूगे ।
मॉरुस हा बु चानि होगे, पोशे मति जानानो ॥

बालु प्यठु लायै नादो, पथ फेर हा शहज़ादो ।
मो च़ल, ग्वडु पाल वादो, पोशे मति जानानो ॥

लीख्य लीख्य ग्रावु हा सोज़य, हा बु नो यिम बहानु बोज़य ।
दावागीर हा रोज़य, पोशे मति जानानो ॥

अजि रॉच़ बु गरि द्रायस, वनुवुनि नॉगी रायस ।
लॉन्य ज़ालु वलनय आयस, पोशे मति जानानो ॥

वति प्यठ च़ोलुहम त्रॉविथ, जिगरस आमताव थॉविथ ।
यिम दॉद्य कसू ह्यकु हॉविथ, पोशे मति जानानो ॥

ऑसुस नैदरे हँच़य, वॉच़ुस चानि खँदमँच़य ।
लोलु चानि राव्यम रॉच़य, पोशे मति जानानो ॥

शर हो च़लिहेम पानस, बेहतो डबि डालानस ।
लगुयो सोरि सामानस, पोशे मति जानानो ॥

महजूर वॅन्य दिवान यारस, बे वफा बॉज़ीगारस ।
दॅप्युतोस कूत काल प्रारस, पोशे मति जानानो ॥

★ ★ ★ ★ ★

जलवु हॉविथ च़ोलुहमो

महज़ूर

जलवु हॉविथ दूर त्राँविथ तंबुलॉविथ च़ोलुहमो ।
आरु रस्तिे यारु लगयो खार थॉविथ च़ोलुहमो ॥

चाख म्यॉनिस लोलु बागस द्राख ताराजा कॅरिथ ।
होश न्यूथम रोशि रोशे, पोश छॉविथ च़ोलुहमो ॥

कौलु रस्ति्यो दोलु वुछनन चॉन्यु कोरनम होल मे ।
सतु वॅरिशे लोलु वॉलिंज कतुरॉविथ च़ोलुहमो ॥

सादु ऑसुस वादु ह्यथ मे उलफतुक सोदा कोरुम ।
रॉज्यु थॉविथ बॉज्यु ख्यॉविथ गाटु पॉविथ च़ोलुहमो ॥

मानुरेन्यु ऑसुस तवय बो लूकु पामन लॉजिथस ।
मंदुछॉविथ अंद त्राँविथ, पामु थॉविथ च़ोलुहमो ॥

कीनु रोटुथम सीनु च़ोटुथम, रोय खोटुथम हाँच़लो ।
छँदुरॉविथ तश्नु थॉविथ पशिनाँविथ च़ोलुहमो ॥

कामु दीवो नामु सूज़िथ पामु लेछितम तथ अंदर ।
हाय पनुने दस्तु मोतुन प्यालु चॉविथ च़ोलुहमो ॥

हियु थॅर ज़न बरु कॅरथस लोलु नारु जॉजिथस ।
सोसुनाँविथ अंद मज़ारस वातुनाँविथ च़ोलुहमो ॥

दूर प्योमुत चूरि ज़न महजूर तस यारस वनान ।
टाठि यारु आदनुक स्नेह मॅशरॉविथ च़ोलुहमो ।।

★ ★ ★ ★ ★

गँजिस चाने कले बोम्बुरो

महजूर

तमन्ना चानि दीदारुक, मे छुम यँम्बुञ्जले बोम्बुरो ।
फोजिस यामथ लँजिस वुछने, गँजिस चाने कले बोम्बुरो ॥

यि कद चोन ज़न छु पोशे कुल, फुलय बरजस्तु छस बिलकुल ।
वुछिथ संबुल तु रँगीन गुल, यि दिल मा तम्बुले बोम्बुरो ॥

वुछुख दूरे मे मस्तूरे, दिलुक स्नेह मे थोवुम चूरे ।
चे लोयुथ तीर ज़न हूरे, यि छ्वख नो ज़ांह चले बोम्बुरो ॥

खँटिथ रूदुख मदनवारय, बदन मे ज़ोलुथम नारय ।
वदन छस चानि अमारय, यि दिल कर शेहले बोम्बुरो ॥

चु यारन सुत्य् छोह मारान, बु तन्हा खूने दिल हारान ।
द्वहस कोत नेरु छस थारान, व्वं छांडथ रोटुले बोम्बुरो ॥

चे कस सुती गँयी सॉज़िश, दोयिम छा ब्याख कांह मे हिश ।
चु म्याने रश्कु पानस निश, रोटुख कमि मसवले बोम्बुरो ॥

यिहम ना हाले दिल बावय, गछि कुठि तोसु वथरावय ।
पनुन जुव पेशकश थावय, मे पानस शर चले बोम्बुरो ॥

यि पर मस यारु कँम्पु चोवुख, चु गॉरन सुत्य् मिलनोवुख ।
कँरिथ तॉवीज़ु ब्रमुरोवुख, कम्पू आरुवले बोम्बुरो ॥

करान महजूर हुस्नस गथ, वनान यारस पतव अख कथ ।
यि दिल देवानु गव च्चैय पथ, बेयिस सुत्पु नो रले बोम्बुरो ॥

★ ★ ★ ★ ★

रोज़ू रोज़ू बोज़ू म्यॉन्य महज़ूर

रोज़ू रोज़ू बोज़ू म्यॉन्य ज़ार मदनो ।
लोलु चानि छसया बेमार मदनो ॥

काचु जून गॉजिथस, सफरस लॉजिथस ।
छोरुमख गामु शहार मदनो ॥

यारु दोद कूठ प्योम, शुर्य पान ज़ायि गोम ।
चे पतु रोवुम ल्वक़चार मदनो ॥

बागुच यँबुरज़ल, दॉन पोश तु मसवल ।
पादन करय निसार मदनो ॥

इशारु हावान, दिल कतुरावान ।
बुमु चानि नाज़ु तलवार मदनो ॥

चुय म्योन गमखार, चुय म्योन सितमगार ।
चुय छ्वख तु चुय हा बुलगार मदनो ॥

खून गोम जॉरी, ओश हॉर्य हॉरी ।
फलि फलि गोम म्वख्तु हार मदनो ॥

नज़रे चानि सुत्यु, बेमार बलेयि कुत्यु ।
म्यानि विज़ि लोगुथ बे आर मदनो ॥

चेश्मु चानि मस खॉस्य्, डीशिथ गॅय वुदॉस्य् ।
बंगॉल्य् जोदूगार मदनो ॥

वनिहे महजूर दास्ताने दिल ज़रूर ।
वनुनस छुय नु तस वार मदनो ॥

★ ★ ★ ★ ★

वेसिये सु म्योन दिलबर

महजूर

वेसिये सु म्योन दिलबर, शीरीं कलाम यियि कर ।
यस कुन वुछिथ च़लान शर, सुय गुल अंदाम यियि कर ॥
यियि ना सु यार म्योनुय, च़लिहे मे ज़ूनु ग़ोनुय ।
वंदस कॅबीलु क्रोनुय, रोज़स ग्वलाम यियि कर ॥

कति लोग करार यारस, कर यियि सु यथ शहारस ।
रोज़स बु इन्तिज़ारस, सोज़स सलाम यियि कर ॥

ब्रम दिथ च़ेलुम सु हाँच़ल, कॅरनस बरु यँबरज़ल ।
कति ब्यूठ, कॅम्पु कॅडुस कल, कति छुस मकाम यियि कर ॥

वॅन्पु छस दिवान च़वपॉरी, यियि ना सना यपॉरी ।
कदमन लगस बु पॉरी, सु छु दूरि गाम यियि कर ॥

शामन अन्योम सालय, कोरमस मे दिल हवालय ।
फीरिथ सु द्राव कालय, बेयि लोल आम यियि कर ॥

गव बांबरे मे यावुन, तॅम्पु त्रोव जलवु हावुन ।
त्राव्या सु म्योन गरु युन, थाव्या मे पाम यियि कर ॥

प्रारान चमन छि गुल ह्यथ, कर यियि सु लालु मस चथ ।
यँबरज़लन अथन क्यथ, बॅर्य बॅर्य छि जाम यियि कर ॥

रॅटिनम बहानु तय हिथ, पोत ज़ूनि गोम नीरिथ ।
होवुन नु रोय फीरिथ, न्यूनम अराम यियि कर ॥

महजूर चॉन्य आलव, बूज्य संगरव तु बालव ।
चान्यव फिराकु नालव, गछि ना सु राम यियि कर ।।

★ ★ ★ ★ ★

वलो लालु रोयो

महजूर

वलो लालु रोयो दिलुक दाग हावय ।
वलो सालु मस प्यालु बॅर्य बॅर्य बु थावय ॥

वलो वादु कॅर्य कॅर्य कॅर २थ बे वफॉयी ।
मोटुय आदनुक स्नेह, वं क्या ताद पावय ॥

वलो टोट जुव छुम, वंदय सुय त्रे पादन ।
यिथय पॉठ्य लोला पनुन बॉगुरावय ॥

वलो लोलु ज़ख्मन मे छुम खून जॉरी ।
रटथ नालु मति, खुन मटि खारुनावय ॥

खॅटिथ पान थोवुथ, चॅटिथ परदु नेरय ।
बरस तल पनुन पान मॉरिथ बु त्रावय ॥

त्रे रोस आरुवलि दूह गुज़ोरुम कंडचन प्यठ ।
दॅज़ुस हरदु ब्रॉह, दरदु के आमतावय ॥

वॅनिथ ज़ानु कस, चॉन्य लोलन कोरुम क्याह ।
यितम थावतम कन, पनुन्य दॉद्य बावय ॥

गुलव म्यानि अशि वानि कॅर्य जामु रॅगीन ।
रंगख जामु कमि वानु योदवय बु रावय ॥

वलो छुसनु महजूर, अथि लोलु वाल्यन ।
लीखिथ दरदु सोज़ुव्यु गज़ल सोज़ुनावय ॥

★ ★ ★ ★ ★

हा गुलो त्वहि मा सु वुछवन

महजूर

हा गुलो त्वहि मा सु वुछवन यार म्योन ।
बुलबुलो तोह्य छॉर्यतोन दिलदार म्योन ॥

वॅन्य दिवान पोशन प्रछोम यँबरज़लन ।
आव मा त्वहि कुन सु जोदूगार म्योन ॥

दॉन पोशव जोशि यिथ व्वज़लॉव्य बाग ।
वरगु ज़न्मस आव लोलुक नार म्योन ॥

रोशि पॉठ्य यित् पोशि बागुक हिथ कॅरिथ ।
चानि यिनु फ्वलि दिलबरो गुलज़ार म्योन ॥

चूरि ललुवुम लोलु ज़र तस मा खबर ।
छायि छाये ज़ायि गव अमार म्योन ॥

ही पोशिक्य पॉठ्य गुज़ॉरुम ज़िंदगी ।
लंजि ऑविजि गव नु गोब ज़ांह बार म्योन ॥

आश रूज़ुम यार वात्यम अज़ पगाह ।
यी करान सोरान आव ल्वकुचार म्योन ॥

उल्फतुक सोदा कुनुम गम मॅल्य ह्योतुम ।
अथ तॅरीकस प्यठ चल्यव बापार म्योन ॥

खस्तु दिल महजूर सर सपनिथ वनान ।
तस मदनवारस नसॉ आव आर म्योन ॥

★ ★ ★ ★ ★

दिल ज़ोलथम मे नारय

महज़ूर

दिल ज़ोलथम मे नारय, दिलदारु वारु वारय ।
कोरथम मे पारु पारय, बे आरु वारु वारय ॥

राथा मे निश बरख ना, साथा च़ रावरख ना ।
ड्यकु मुच्चरिथ करख ना, कथु तारु वारु वारय ॥

नेहु गटि आख नीरिथ, शाहानु जामु पुरिथ ।
शामु छायि गोख फीरिथ, गुलज़ारु वारु वारय ॥

पोशि टूर्य मुश्कु बैर्यथख, रसु पौठ्य गंड मुचुरथख ।
असुवुनि दहानु कौर्यथख, आवारु वारु वारय ॥

प्रारस पोहस तु मागस, चमनस अंदर बु प्रारस ।
द्यव गुल फवलन मे बागस, दुबारु वारु वारय ॥

मस दामु दामु चौविथ, ह्यस होश रावुरौविथ ।
कथ कुन च़ोलुख मे त्रौविथ, ल्वकुचारु वारु वारय ॥

जानानु बु वंदय जान, छी जान जान सामान ।
जलवु चानि जान सपनान, नाकारु वारु वारय ॥

योद यारु खाबस अंदर, रोज़ख यिवान बराबर ।
अदु चानि दूरिरुक ज़र, संदारु वारु वारय ॥

महजूर छुय दवा बस, दिलु किस गमस अज़ाबस।
अथ लोलु किस रबाबस, गंड तारु वारु वारय।।

★ ★ ★ ★ ★

गुलज़ार छावुन छुम

महज़ूर

सुबह छुम बाग छुम मस्तानु दिल छुम ताज़ु यावुन छुम ।
बहारस दाद ह्योन छुम शोक सान गुलज़ार छावुन छुम ॥

दिलुक गुलज़ार फोलमुत छुम मे पोशव नाल वोलमुत छुम ।
न कांह गुल संबुलावुन छुम, न बुलबुल तंबुलावुन छुम ॥

पज़्या शीशस लदुन पुर मस, पनुन वस ज़ांह दिज़्या गॉरस ।
दिलुक नोव बानु पनुने खानु पानय आछुनावुन छुम ॥

अथव सुत्य् छुस बनावान पोश, गछान बुलबुल वुछिथ बे होश ।
छु क्या मुशिकल बनावुन गुल, तगान बुलबुल बनावुन छुम ॥

गॅरीबन बुलबुलन हुंदि खून सुत्य् गुल जामु रंगुनावान ।
गुलन नोव रंग दिनु बापथ नोवुय रो मंगुनावुन छुम ॥

गुलन बुलबुल छु पतु लारान, बोम्बुर यँबुरज़लन छारान ।
वनान पुश पोशि नूलन कुन, यि दून हुंद फितनु सादुन छुम ॥

छु बिसियार बाज़रन अंदर फरीबुक माल, जुल्मुक ज़र ।
न सोदा ह्योन चुकावुन छुम, पनुन मन आज़मावुन छुम ॥

न छम कैह ज़ीरुकी हावुन्य, न छम नामावॅरी पावुन्य ।
रॅफीकन दरदिलन पनुन्यन, दिलुक अवहाल बावुन छुम ॥

मुवॉफिक वक्त छुम ह्यमथ ति ड़म सामानु हॉज़िर छुम ।
पनुन वुछु प्रंग चलोविथ दुश्मनन आसमान हावुम छुम ॥

छे ह्वछिमचु पोशि थरि बागस, वॅमी आबस गॅमुचु नागस ।
खसुन छुम ओबुर लॉगिथ आसमां, बारान त्रावुन छुम ॥

ववुख पोश पोशिवुन्यु चॉरिथ, तिथी बुलबुल अनुख छॉरिथ ।
नोवुय बागा बनावुन छुम, नोवुय दुनिया बसावुन छुम ॥

छे हॅस्ती पोशिवुन्यु मॅस्ती, खरॉबी बे खुदी पॅस्ती ।
खुदी हुंज़ तोफ लॉयिथ बे खुदी हुंद किलु पावुन छुम ॥

अॅमीरस ऑश तय शॉदी, गॅरीबस खानु बुरबॉदी ।
यिथिस मगरूर आसन वॉल्यु सुंद नावुय मिटावुन छुम ॥

मॅशीदन मंदुरन गिरजन, दर्मसालन तु अस्तानन ।
यिमन यीत्यन गरन अचनुक कुनुय दरवाज़ु थावुन छुम ॥

वॅशीरुय मशरिकस बेदार करि वुज़नावि वक्तस प्यठ ।
यि आलव कॅशिर्यन हुंघन कनन मंज़ वातुनावुन छुम ॥

सछु महजूर मस फिरान खास्यन, यि लोलुक मस छु, सॉरी चन ।
दपान पनुन्यन तु बेयि परघन, योहय मस बॉगुरावुन छुम ॥

★ ★ ★ ★ ★

वेसिये आदनुक यार

महजूर

वेसिये आदनुक यार कोतुय गोम
दिल करार टोठ मदन वार कोतुय गोम ।
प्वख्तु कार यार म्वख्तु हार कोतुय गोम
दिल करार टोठ मदन वार कोतुय गोम ॥

तेज़ पॅक्य पॅक्य क्या हॉसिल आम
मँज़िलस वातुनय सपनुम शाम ।
चिकुचाव रोवुम, ल्वकुचार कोतुय गोम
दिल करार टोठ मदन वार कोतुय गोम ॥

हर्दुक्य वावन डोलुम होश
कॅल्य गॅयि कोस्तूर्य, बरु गॅयि पोश ।
पचलुवुन हार नव बहार कोतुय गोम
दिल करार टोठ मदन वार कोतुय गोम ॥

तस पतु लारान लूसिम पाद
खसुवुन यावुन गोम बुरबाद ।
संगदिल यार बे आर कोतुय गोम
दिल करार टोठ मदन वार कोतुय गोम ॥

शोक मंगुनोवुम पॉरिम मस
जान पान बख्शुम कलुवालस ।
बे हिसाब मस चथ खुमार कोतुय गोम
दिल करार टोठ मदन वार कोतुय गोम ॥

अज़ ताम यथ प्यठ ओसुम यकरार
अज़ कोरुम पानय तथ इनकार ।
अथ जायि वॉतिथ गाटुजार कोतुय गोम
दिल करार टोठ मदन वार कोतुय गोम ।।

त्रावि येलि महजूर बाग छावुन
अदु वनि आरुवल मसवलि कुन ।
राज़दार नाज़ बर्दार कोतुय गोम
दिल करार टोठ मदन वार कोतुय गोम ।।

★ ★ ★ ★ ★

रोशि रोशि छुख च़लान

महज़ूर

रोशि रोशि छुख च़लान पाय करू म्योन
बु नो ज़रु मदनो दूर्यर चोन ।
पौर्य पौर्य लगुयो वंदुयो क्रोन
बु नो ज़रु मदनो दूर्यर चोन ।।

आलुवन म्यान्यन छुनु तौसीर
चानि मिलुच़ारुक क्या छु तदबीर ।
वनतो किथुपौठ्य सपनख म्योन
बु नो ज़रु मदनो दूर्यर चोन ।।

शोक़ चानि पानस कर्योम पौराव
मदनो अदु नो ह्योतुथम नाव ।
ज़ायि गौम माँज़ि नम तु महारेन्य तोन
बु नो ज़रु मदनो दूर्यर चोन ।।

हुस्न दमु दमु रंग बदलावान
लोल प्रथ रंगु तस परज़ुनावान ।
पोश आयि नँव्य नँव्य तु बुलबुल छु प्रोन
बु नो ज़रु मदनो दूर्यर चोन ।।

रुदुम नु पानस प्यठ यखतियार
तस पथ दिल गोम युस छु बे आर ।
ज़ोरावार प्योम अज़लय लोन
बु नो ज़रु मदनो दूर्यर चोन ।।

आदनुक यार गोम थॉविथ आमताव
क्या मे फोलराव्यम सोंतुक वाव ।
दिल छा पोशि टूर असुनावोन
बु नो ज़रु मदनो दूर्यर चोन ।।

दिल महजूर तय चेश्मु मखमूर
नखु नखु ऑसिथ छि वाराह दूर ।
चेश्मव वुछ, दिलन दिलबर ज़ोन
बु नो ज़रु मदनो दूर्यर चोन ।।

★ ★ ★ ★ ★

कवो छुख मे त्रॉविथ

महजूर

कवो छुख मे त्रॉविथ चलान टाठि यारो ।
कवो छुख च्च वादस डलान टाठि यारो ॥

वॅनिथ लोलु गुफ्तार च्चे ति आर अनुहय ।
च्चे डीशिथ मे ज्यव छम कलान टाठि यारो ॥

गॅजिम वारु हन हन मे अमारु चाने ।
मगर लोल नो चोन गलान टाठि यारो ॥

वौलुख मा च्चु येम्य आहे दर्दक्य गुबारन ।
तवय गुमु छुय बुथ छलान टाठि यारो ॥

हॅकीम यस च्चु आसख तॅमिस मोत करि क्या ।
सु बेमार ज़ांह नो बलान टाठि यारो ॥

छि शहमार गेसू वॅलिथ नाल दूरन ।
यिम आसन दूदस मंज़ पलान टाठि यारो ॥

अकी शक्ति फोल्क्यमुत्य बुछिम सासु बॅद्य पोश ।
ज़ु इनसान हिव्य नो रलान टाठि यारो ॥

छे कर नुंदुबॉन्क्य काँसि स्योद रोय हावान ।
तवय आबु मंज़ु ज़ून अलान टाठि यारो ॥

छु महजूर खदवय वुछान नाज़नीन ।
तँमिस नो छु दिल तंबलान टाठि यारो ॥

★ ★ ★ ★ ★

नाल-ए-कश्मीर

महजूर

तंबुलावान पोशि नूलन बुलबुलन गुल्डजार म्यान् ।
संबुलावान रॉव्युमृत्यु दिल आबशार सब्जार म्यान् ॥

आलमुक्य बेमार गरु म्योन आय वापस गॅय बॅलिथ ।
त्रेशि हॅत्यु पेमुत्यु वतन प्यठ जुव दिवान बेमार म्यान् ॥

बु ति युथुय असिस नु, ओसुस वक्तु अकि बा यखतियार ।
दिन गवॉही म्यानि कनि यिम प्रॉन्थ कनि देवार म्यान् ॥

बागु मंजु म्यॅच तुल ज़रा आहिस्तु ब्वन कुन कर नज़र ।
सुत्यु अथ मेचि छी रलेमुत्यु अडु फोल्थु गुलज़ार म्यान् ॥

म्यानि बचनुक म्यानि गरि योद आसिहे कांह इन्तिज़ाम ।
फेरुहन मा वंदु रॉचन दरु बदार बेकार म्यान् ॥

क्या वनय वॅरियस जॅखिथ ज़ीनिथ बु रूदुस फाकु मस ।
ब्याज़-रो वान्यव तु स्वनुरव गॉब कॅर्य अंबार म्यान् ॥

छुस मंगान यारब अॅमीरन ज़्यादु दौलथ कर अता ।
अथ बदल कांछान तबॉही म्यान्थु दुनियादार म्यान् ॥

म्यान्थु न्यथुनॅन्थु बचु रूज़ी वातुनावान प्रथ अॅकिस ।
अथु दारान छी गॅरीबन राथ दूह ज़रदार म्यान् ॥

याद थव यिम म्यॉन्व् मुफलिस फाकु फरि येलि थोद व्वथन ।
दीलतुक्व् मौलिख बनन ऑखुर यिमय नादार म्यॉन्व् ॥

जनतस मंज़ जाय हॉसिल करनु बापथ दिन नियाज़ ।
बीमु करनावन छि स्वर्गस पायि बॅड्य दीनदार म्यॉन्व् ॥

स्वन तु र्वफ ह्यथ द्रास बाज़र, तोरु दिन्नहम चाय नास ।
सरु सपनिम वारु पर दारुक्व् छि यिम बाज़ार म्यॉन्व् ॥

म्यानि लसनुक चारु करुहन, छख नु फुरसथ क्या करन ।
गर तनाज़स कुन छि लॅग्यमुत्व् वुन्व्क्यनस अबरार म्यॉन्व् ॥

★ ★ ★ ★ ★

लोल चूरो म्योन दिल चय

महजूर

लोल चूरो म्योन दिल चय, जान चय, जानानु चय ।
राहजन चय, राहनुमा चय, राहतुक सामानु चय ॥

मॉर्यमंदि कति आख, ह्यू कांह छुय नु समसारस अंदर ।
या खोतुख पातालु अँदुरु, या वोथुख असमानु चय ॥

विह्य कॅरिथ ब्योन ब्योन, च्ने होवुथ पान, ब्रमुरोवुथ जहान ।
ओबुर चय, दॅरिया ति चय, हाँगिन्य ति चय, दुरदानु चय ॥

छुख बेयन हुंघ आँब गँजरान, छय नु पानस कुन नजर ।
जान छुख गाटुल लुकन क्युत, पनुनि विजि दुरदानु चय ॥

कस करान छुख पोशि पूजा, कोर कुन लॉजिथ न्यमाज ।
बंदुगी कर पॉन्य पानस, काबु चय, बुत खानु चय ॥

क्याजि छुख मोहताज, कलुवालस तु प्यालस कुन वुछान ।
मस ति चय साकी ति चय, पैमानु चय, मयखानु चय ॥

लाग पानस पानु गतुरेन्य, सोजु पनुने ज़ाल पान ।
नार छुख चय, नूर छुख चय, शमा चय परवानु चय ॥

हीतु गरु महजूर कवु बदनाम कोरथन खा-मखाह ।
हाचु क्या, इलज़ाम क्या, ननि वानु हाचल पानु चय ॥

★ ★ ★ ★ ★

पाँदु कर पानस अंदर

महजूर

बन च्चु जौहर रंगे दिलबर पाँदु कर पानस अंदर ।
परदु साँरी दूर कर, पानस तु जानानस अंदर ॥

नेर अनि गटि निशि न्यबर, आगुर च्चु हुस्नुक सरु कर ।
कूत काला बंद रोज़ख, जुल्फे पेचानस अंदर ॥

गुल बँनिथ दूह तारु थरि प्यठ ख्वश युवुन नज़ारु हाव ।
कौड बँनिथ यँन्नकाल यिनु रोज़ख गुलिस्तानस अंदर ॥

परु छ्योन ओस, रूदु कतराह, म्वख्तु फोल किथु पाँठ्य गोस ।
थज़रु प्यठु बे वाय व्वठ तँम्य लॉय तूफानस अंदर ॥

मानु हा बु ति चोन इरफान, ज़ानु हा बु ति चोन ग्यान ।
पनुनि चनु बापथ पनुन खून कोनु छुय बानस अंदर ॥

मेज़ि तल बेह वॉज मंज़, नतु पर गँडिथ खस आसमान ।
यिम ज़ु ताकथ क्वदरतन थँव्यमुत्त्य छि इन्सानस अंदर ॥

अज़ छि तस मानान गाटुल, सुय छु ज़ीरक प्वख्तुकार ।
म्वख्तु हॉविथ फोतु यस वरतावि यारानस अंदर ॥

मज़हबन हुंघ ज़ोर गँय कम, मानमँन्य हुंद दोर आव ।
समयि फ्युर गव, च़ाव साइन्स दीनो ईमानस अंदर ॥

याद थव महजूर सुय बनि दुनियाहस मंज़ बा कमाल ।

ज़िंदगी गुज़रावि युस शोकस तु अरमानस अंदर ॥

★ ★ ★ ★ ★

न्याय त्राँविव माय थाँविव

महजूर

न्याय त्राँविव माय थाँविव पानु वॉन्व ।
पोज़ मोहबथ बाँगुराँविव पानु वॉन्व ॥

साफ थाँविव सीनु मँशराँविव फसाद ।
कीनु त्राँविव दाँद्य बाँविव पानुवॉन्व ॥

वक्ते मुश्किल ह्यमतो समतो वँरिव ।
अख अँकिस अथु शेहलाँविव पानुवॉन्व ॥

जाथ बुतराथ काँशुर्यन हुंज़ छव कुनिय ।
खामुखाह दूर्यर मु पाँविव पानुवॉन्व ।

द्वद छु मुसलिम ह्योद छु शकर साफ साफ ।
द्वद तु बेयि शकर रलाँविव पानु वॉन्व ॥

हँद्य रटन नम खूर वायन अहले दीन ।
नाव येमि मुल्कुच चलाँविव पानु वॉन्व ॥

कोर बटस पथ जुव फिदा कुदि गोजिवॉर्य ।
अज़ तिमय कथु याद पाँविव पानु वॉन्व ॥

रँछ सिरिज काकन मुसलमान गबर ग्रँज़ ।
दिल तिथय पाँठ्य मिलुनाँविव पानु वॉन्व ॥

सानि वतनुक कुस छु दुश्मन कुस छु दोस्त ।
जहल त्रॉविथ गँज़रॉविव पानु वॉन्पु ॥

गॉर न्वकसान करि नु तुहँदिस इज़तस ।
युथ नु तुह्य इज़थ हरॉविव पानु वॉन्पु ॥

गर तनाज़स गॉर शूब्या ? ? ? ? ।
न्याय वतनुक्य् अँज़रॉविव पानु वॉन्पु ॥

अख अँकिस प्यठ युथ नु ज़ांह काँछिव बँदी ।
युथ न साँ ज़ांह रावुरॉविव पानु वॉन्पु ॥

योद थँविव अथुवास त्वहि पोशव नु कांह ।
छयन कँरिथ यिनु पोशिनाँविव पानु वॉन्पु ॥

पानु वॉन्पु यिनु अख अँकिस दुश्मन बँनिव ।
फितनु यिनु ज़ांह वुज़नाँविव पानु वॉन्पु ॥

कुस दपान छुवु बाँगुरॉविव कुल्य् तु पोश ।
बुलबुलव गुलज़ार छॉविव पानु वॉन्पु ॥

बाँय सुंद बाँयिस शूब्या थावुन मलाल ।
गंड दिलन हुंघ मुन्नरॉविव पानु वॉन्पु ॥

हेछिनाँव्यूख रुत पकुन नादान बाँय ।
अख अँकिस ह्यमथ बडॉविव पानु वॉन्पु ॥

यिम गँरीब आसन तिमन अथु रोट कँरिव ।
बाँय बाँय छिवु रँछुरॉविव पानु वॉन्पु ॥

मिलुचरुक द्युत यि महजूरन सबक ।
याद थॉविव बोज़ुनॉविव पानु वॉन्य ।।

★ ★ ★ ★ ★

नोव दुनिया

महजूर

नोवुय गुल तय नोवुय बुलबुल, नोवुय गुलज़ार आसुन गोछ ।
नोवुय मस तय नोवुय साकी, नोवुय पैमानु आसुन गोछ ।।

नोवुय बुतराथ नोव असमान, नोवुय रव तय नोवुय परतव ।
नोवुय सुबहा, नोवुय शामा, नोवुय समसार आसुन गोछ ।।

नव्यन वानन नोवुय ह्योन ह्युन, नव्यन बानन नोवुत सोदा ।
नव्यन वान्यन नोवुय बापार, नोवुय व्यवहार आसुन गोछ ।।

वुन्युक तामथ तरान आय प्रॉन्य सॉरी प्रानिवुय तारव ।
व्वं अथ सँदरस तरन वाल्यन नोवुय कांह तार आसुन गोछ ।।

स्यटाह प्रान्योव रस्मे हुक्मरॉनी यथ जहानस मंज़ ।
नोवुय कोनून नोवुय दफ्तर, नोवुय दरबार आसुन गोछ ।।

कितॉबी मज़हबुक मिलुघार, ज़ेवि हुंद कोल गव प्रानान ।
दिलन अंदर नोवुय लोलाह, नोवुय समघार आसुन गोछ ।।

व्वं कोताह काल कमज़ोरन करन पामाल ज़ोरावार ।
यिमन कमज़ोर इनसानन ति दिल हुशयार आसुन गोछ ।।

दूहस जुव जान च़ॉटिथ शामस अँडुय च़ोट छुम दिवान मॉलिख ।
कमस रॉज़ी बु, सु ति म्यॉनिस गमस तन दार आसुन गोछ ।।

गॅरीबन क्युत छु यक अनार व सद बेमार मुश्किलु सान ।
दपान ज़रदार अख बेमार हथ अनार आसुन गोछ ।।

बु करु हा काँसि हुंदिस कोलु सुय पथ जुव पनुन क्वरबान ।
अथ अहदो पैमानस दिलुक यकरार आसुन गोछ ।।

अगर जिमुदार म्यॉनी ज्यव छे म्यान्यन सारिनुय स्वखनन ।
खयालन दिलुचन रायन ति कांह जिमुदार आसुन गोछ ।।

वनस मंज रोज़ु हा तन्हा, दिलुक हाल रॉयिलन वनुहा ।
बहारुक ज़ोर आरुक शोर, अचुवुन हार आसुन गोछ ।।

चवान पर मस, लगान छुम रस, स्यठाह छुस लोग मँदरेरस ।
बु वतनुक लोलु मस चमु हा, मगर मज़दार आसुन गोछ ।।

वुछिथ महजूर नविरस कुन, नोवुय रंगाह ह्यवान हावुन ।
नँविस समयस नँविस दोरस, नोवुय गुप्तार आसुन गोछ ।।

★ ★ ★ ★ ★

वज़नि लोग बेयि

महज़ूर

वज़नि लोग बेयि ज़िंदुगी हुंद साज़ म्योन ।
साज़ म्योनृ जहार करि व्वन्य राज़ म्योन ॥

बाग म्योनुय, गुल ति म्योन, सुम्बल ति म्योन ।
बोलुवुन बुलबुल छु ख्वश आवाज़ म्योन ॥

पंजरु मंज़ु नीरिथ वुफुन यामथ ह्योछुम ।
आसमानस प्यठ ति गव परवाज़ म्योन ॥

कमि मज़हबु खुन म्योन ज़ोनुख हलाल ।
स्रोग कुनुन त्रोवुख वतन प्यठ माज़ म्योन ॥

खत्म गछि चंगेज़ख़ौनी शोर व शर ।
रोज़ि कौयिम ता अबद शीराज़ म्योन ॥

रातु म्वगलस ज़रवि कुस चमनस अंदर ।
पंजि दिथ तस लंजि कडि शाहबाज़ म्योन ॥

आसि योद फौलाद तन इस्फंद्यार ।
तस अँछव किन्य मारि तीर अंदाज़ म्योन ॥

हमलु करि यमराज़ ह्यू दुश्मन अगर ।
पथ कोहन तस लार करि कमराज़ म्योन ॥

दोप यि साज़न बोज़ि कुस म्योन सोज़े दिल ।
कुस छु महज़ूरस वराय हमराज़ म्योन ॥

★ ★ ★ ★ ★

साकिया बेताब कोरथस

महजूर

साकिया बेताब कोरथस, चावतम शोकुक शराब ।
त्रावतम गमगीन दिलस मंज़ दर्दो सोजुक इज़तराब ॥

वाव सुबहुक चाव बागस, सुत्य् पानस क्याह ओनुन ।
बुलबुलन क्युत ऐश-ओ-राहत रातु म्वगलन क्युत अज़ाब ॥

आवलुन छोर प्यालु ह्यथ फेरान नचान रातस दूहस ।
द्युत नु आसन वॉल्य् दॅरियावन तॅमिस अख कतरु आब ॥

मंगुनुक तय ज़ारु पारुक वक्त गव, नोव दोर आव ।
यस मछन मंज़ ज़ोर आसन, रोज़ि सुय व्वन्य कामयाब ॥

वलवलाह, जोशाह, हुबाबाह, इज़तराबाह, ह्यमथाह ।
पाँदु गछि यामथ दिलन अंदर तु सुय गव इनकलाब ॥

म्योन बुड्य बब मालो जान ह्यथ, त्रामु पाँसन कुननु आव ।
माल होरुम, जान छिम बाकी कडान, वुछतव हिसाब ॥

नखवतुच खँहरन लँजिख, अवज़ार जुल्मुक्य तेज़ गँय ।
वक्तु विज़ि म्यकराज़ जुल्मुच च़टि ग्वलॉमी हुंज़ तनाब ॥

लछि बँद्य लूख बाग छावन, गुल नवन, बुलबुल ग्यवन ।
क्याह हर्ज केचन पुशन हुंद्य खानु योद सपनन खराब ॥

गर्जु पनुने यिम छि आजॉदीये मुल्कुचि बर खलाफ ।
वक्त येलि सॉबित कर्यख, पनुन्यन शुर्यन क्याह दिन जवाब ॥

यक तरफ रोज़ त्रॉविथ ऐ दुश्मने गुलज़ारे कौम ।
छुम कुल्यन सग वातुनावुन, सानि क्वले फ्यूर आब ॥

वाव असुनावान गुलन, महजूर वुज़ुनावान दिलन ।
यिम ज़ि अमि निशि बे खबर, क्याह गव गवनाह, क्याह गव सवाब ॥

★ ★ ★ ★ ★

नोवुय शोरा छु

महजूर

नोवुय शोरा छु वुन्यक्यन बागु क्यन जानावरन अंदर ।
नोवुय सोज़ा छु तुलमुत पोशि नूलव पंजरन अंदर ॥

स्यठाह पॅक्य पॅक्य तु थॅक्य थॅक्य कारवां छुनु मँज़िलस वातान ।
खरॉबी कस्मतुच छा या छे खॉमी रहबरन अंदर ॥

बहारस तुलरि गछुहन दूर, अनुहन व्यूर सौबुरॉविथ ।
फिज़ा छुनु साफ, तिमि गुं गुं करान पनुन्यन फरन अंदर ॥

ठिपिस मंज़ जिंदुगी हुंघ ज़्यादु दूह योदवय मे गुज़रॉविम ।
छु बाक्य कुवते परवाज़, वुनि म्यान्यन परन अंदर ॥

नज़र शाह पॉज़ु संज़ छुनु बँस्तियन प्यठ, छुस थज़र वाराह ।
पनुन रूज़ी छु छारान पानु बालन संगरन अंदर ॥

न अँज़्यक्यन आशकन अंदर तमन्ना सर फरोशी हुंद ।
न शाने दिलबॅरी कौयिम छि अँज़्यक्यन दिलबरन अंदर ॥

वँसिथ ब्वन ब्वन ग्रज़ान यिम आरु, गछ वुछ यिम छि कति यिवान ।
यि शोरो शर यि बद मँस्ती वुछख कर आगरन अंदर ॥

बड्यन हुंघन गरन अंदर छु जानुक डर तु मालुक ज़र ।
छे ह्यथ तय दिलेरी मुफलिसन हुंघन गरन अंदर ॥

छु अक्सर पाक सीरथ दूरि रोज़ान छायि लूकव निश ।
तवय लोब कुन छि रँटमुच्च जाय पम्पोशव सरन अंदर ॥

ह्यकान छुनु रोफ वँरिथ व्वसताद म्यान्यन सीनु क्यन चाकन ।
गँमुच्च कमज़ूरियाह पॉदा छे शायद रोफ गरन अंदर ॥

चु थव महज़ूर कॉयिम शाने ख्वद दॉरी ज़मानस मंज़ ।
योहय जौहर अज़ नायाब सान्यन शॉयिरन अंदर ॥

★ ★ ★ ★ ★

आज़ादी

महज़ूर

सना सॉरी पॅरिव सान्यन गरन मंज़ चायि आज़ादी ।
स्यठाह यॅचकॉल्य् असि कुन जलवु हावान आयि आज़ादी ॥

यि आज़ादी ग्वडन्य् येलि द्रायि नॅन्य् हिदूस्तानस मंज़ ।
लछव पॉठ्य आयि इनसानन लदान तिलु क्रायि आज़ादी ॥

यि आज़ादी छि त्रावान मगरिबस कुन रहमतुक बारान ।
करान सॉनिस जॅमीनस प्यठ छरेय गगरायि आज़ादी ॥

गॅरीबी मुफलिसी बेबूज सुत्य् ह्यथ खानु वॉरॉनी ।
अमी रुच्चि त्रायि असि प्यठ आयि त्रावान सायि आज़ादी ॥

यिमय चीज़ असि ग्वलामन ऑस्य् जॉलिम ज़ोरु मॅल्य् ह्यावान ।
कुनान ती बाज़रन अंदर वॅरिथ मुलु मायि आज़ादी ॥

चे क्या बूजुथ यि आज़ादी, यि छा करु मुठ कुनुन बाज़र ।
छे रॅटमुच्च होटलन मंज़, आयि लिपटन चायि आज़ादी ॥

यि आज़ादी छे क्वकुराह जान, स्वनु सुंद्य तूल कैह त्रावान ।
तिमय कैह तूल ह्यथ व्वन्य् बीठमुच्च बेयि प्रायि आज़ादी ॥

यि आज़ादी छे स्वर्गुच हूर, फेर्या खानु पतु खानय ।
फकत कॅचन गरन अंदर छे मारान ग्रायि आज़ादी ॥

यि आजॉदी दपान सरमायिदॉरी छनु कुनी थावुन्यु ।
व्वं पनुन्यन निशि छे सौबरावुन ह्यवान सरमायि आजॉदी ॥

लुकन प्यठ गॅयि यि आजॉदी स्यठाह गोब हारि परबथ ज़न ।
छे केंचन ख्वश नॅसीबन पोशि तुल्यु ज़ुय डायि आजॉदी ॥

लडान येलि हॉल्यु तय चकदार, छि वालान अख अँकिस तिम रथ ।
तमाशा छख वुछान ल्वति पॉठ्य रुज़िथ छायि आजॉदी ॥

लुकन मातम, गरन अंदर बिहिथ महाराज़ु ही हॉकिम ।
यिमव रॅटमुच्च छे पानस सुत्यु खलवथ शायि आजॉदी ॥

गॅरीबन वारसी करुहन मगर छनु हॉकिमन फुरसथ ।
तिमव लॅब मोटरन अंदर, दवान थदि पायि आजॉदी ॥

गॅमुत्यु दम फुट्यु छि सॉरी, बे करॉरी छख दिलन अंदर ।
दपान वनुहव पनुन अहवाल, असि मा लायि आजॉदी ॥

★ ★ ★ ★ ★

साहिबो सथ छम मे चाँनी

महजूर

साहिबो सथ छम मे चाँनी, वथ मे असलुच हावतम ।
कूत कालाह रोज़ बे ज़ान, ज़ॉनि हुंद मस चावतम ॥

बोज़तम फ़ेरियाद व ज़ॉरी, सोज़तम दाद्यन दवा ।
रोज़तम हर दम मेहरबान, ज़ांह ति परु मतु पावतम ॥

काँहिली, कम ह्यमती, वसवासु निशि थवतम मे दूर ।
वलवलाह, जोशाह तु अरमानाह दिलस मंज़ त्रावतम ॥

ज़ांह मतु वनुनावतम अफसानु नैदुर पावनुक्य ।
म्वरदु येमि सुत्यु ज़िंदु सपनन, तिथ्यु वचन वनुनावतम ॥

यिम सुखन पाँदा करन, खलकन अंदर उलफत तु लोल ।
दूर येमि सुत्यु गछि नफरत, ती वनुन हेछिनावतम ॥

फवलुनोवथस पानु अचुवुनि ज़ेठु वावुचि ग्रायि सुत्यु ।
सोरवुनि मंजहोरु तापुकि ज़ोरु मत२ छँचरावतम ॥

शबनमुक्य पाँठ्य आफताबस कूत काल करु इन्तिज़ार ।
ग्वडनिचे अनवारि पोशन सुत्यु सुलि वुज़नावतम ॥

शकिल छुस इनसान मगर इनसॉनियतु निशि बे खबर ।
ह्यावतम मतु इम्तिहान, येमि शकिल मतु मंदुछावतम ॥

दूर छुस प्योमुत लुकव निशि, छुम तवय महजूर नाव ।
तिम अगर दूरन मे निशि, च्चु ति दूर मतु ज़ांह त्रावतम ॥

★ ★ ★ ★ ★

सालस अनतनी बॉलिये

रसूल मीर

लालस वनतय छुस सवाल । सालस अनतनी बॉलिये ॥

मदु छस अज़ छुम कमाल, अदु नय रोज़्यम कौलिये ।
वदु ना रोवुम जमाल, सालस अनतनी बॉलिये ॥

चारदान तय काँठु माल, तस कित्य् छिम कनु वॉलिये ।
कनु फँल्य् बँगौल्य् छाल, सालस अनतनी बॉलिये ॥

खूब रोय माह मिसाल, अबरो छिस ज़ु हिलौलिये ।
रूबरू डेशुन महाल, सालस अनतनी बॉलिये ॥

अँलिफस कोरनम दाल, जुल्फन क्याह छिस ज़ौलिये ।
उल्फतु वोलुनम नाल, सालस अनतनी बॉलिये ॥

डीशिथ तँम्य सुंद खाल, दाग ह्यथ ज़ून गँयि खौलिये ।
सूरुस हुस्नुक खयाल, सालस अनतनी बॉलिये ॥

मस खौस्य् मालामाल, बँर्यनस वँक्य् कलुवौलिये ।
चेशु छस रशके गज़ाल, सालस अनतनी बॉलिये ॥

मोहु तीर अँछर वाल, जिगरा कँर्यनम अँलिये ।
वनुहस बोज़ि ना हाल, सालस अनतनी बॉलिये ॥

रोशन छुस म्योन हाल, रोशन कवु छुम बॉलिये ।
पोशन करुसय माल, सालस अनतनी बॉलिये ॥

नेरान छुस नु मलाल, फेरान छुम बॉल्य् बॉलिये ।
रसूल छुस दिवान नाल, सालस अनतनी बॉलिये ॥

★ ★ ★ ★ ★

हॉरिये थावख ना कन तु लोलो

रसूल मीर

हॉरिये थावख ना कन तु लोलो । ज़ार म्यॉन्य तोतस वन तु लोलो ॥
मदनस वनतसे अनतसे आर । वदनस छुम नु ज़ांह छ्यन तु लोलो ॥
बॉलिये वनतसे कॉल्य् राव्यम । वॉल्य् कन ज़ॉल्य् छा स्वन तु लोलो ॥
बादाम चेश्मु यनु मुन्नराव्यन । तनु छुम मॅन्नरावन तु लोलो ॥
जुल्फ़ छस जीम तय मीम दहान । सीमाब ख्वय सीम तन तु लोलो ॥
ससनु मे कोरनम कामु दीवन । स्वनु छम पामु दिवन तु लोलो ॥
हियि कोरनम क्वंगु पोशुक रंग । योस्मन गॅयम सोसन तु लोलो ॥
हारुने तापय गॉजनस बो । दॉन्य दान्य् शीनु मॉन्य ज़न तु लोलो ॥
आलम गेलि तु क्याह छु परवा । मेलि येलि सोदा वोन तु लोलो ॥
बरुसय द्यन सॅन्यास्यन सुत्य् । करुसय तॉवीज़ु पन तु लोलो ॥
अँश्कुने आवरेनि मंज़ छु पोंपुर । नारु पान वारु ज़ालन तु लोलो ॥
डूरि तय वेरनागु हेमुसय ज़ाग । रोसुल मीर त्त्य् छु आसन तु लोलो ॥

★ ★ ★ ★ ★

बाल मरॉयो

रसूल मीर

बु ति नो यि दूर्यर चोनुय ज़रय, बाल मरॉयो ।
क्याह करु थोवथम ज़रु ज़रय, बाल मरॉयो ॥

दिल खस्तु कॅरथस नस क्याह छय, र्वपु सुंज शमशेर ।
कम शेर मॉरिथ खंजरय, बाल मरॉयो ॥

दिलबरु अछतो म्यानि बरय, द्यवु बरय द्यन ।
चे रोस गुल ज़न गॅयिसु बरय, बाल मरॉयो ॥

शहमार जुल्फव नाल वोलुहम, रूद अफसानय ।
व्वन्य वनतु कम अफसानु परय, बाल मरॉयो ॥

अंबरु नॉविथ पान पॉरान छस बु यॅबरज़ल ।
बौबूर म्याने अंबरय, बाल मरॉयो ॥

थरु छम मे हुरान आयि हरान, हुस्तु थरे गुल ।
दिल छुम नु ह्यवान थरु थरय, बाल मरॉयो ॥

शरमंदु कॅरथस आफताबो, कंदुहारुच ज़ून ।
कजि चानि गॅजसो लॅजुस दरय, बाल मरॉयो ॥

छुम खफु लारय पतु लायय ब्रोंठ नालस थफ ।
दामानु रटय महशरय, बाल मरॉयो ॥

शमशाद खामत आम हलान बार अँशकुन हीथ ।
खम गोम पुशतस लूचरे, बाल मरॉयो ॥

यथ लोलु बागस ज़ख्मे दिल गुल, सरव म्योनुय आह ।
अँश वानि सुती ज्वयि फिरय, बाल मरॉयो ॥

ह्यसु व्यसुरॉवथस असि रोस्तुय, व्यसु कमो छय ।
तिमु सानि खोतु छा स्वंदरय, बाल मरॉयो ॥

ननि कथु वनिनम अनि गटि अँम्य लाल फरोशन ।
कनि मंज़ु नेरान जौहरय, बाल मरॉयो ॥

जेबा बु द्रायस बोज़ु नेबाह चोन निगारो ।
चेय पतु द्रायस क्रानि गरय, बाल मरॉयो ॥

हा रंजि बुमय चानि लायान रुमु रुमय तीर ।
वाँलिंजि कॅर्यथम पंजरय, बाल मरॉयो ॥

बो शरमि गँजुस शर मे गोमो, कर मे ज़ोनुम हय ।
अज़ कोर मे करमय लोन सरय, बाल मरॉयो ॥

रोसुलि गोलथस होलु ह्यसय, कोलु मसॉ डल ।
बो लोलु मसय खॉस्यु बरय, बाल मरॉयो ॥

★ ★ ★ ★ ★

चानि छुम जानुक कसम

रसूल मीर

यारु लोगुथ संगदिल, चानि छुम जानुक कसम ।
मारु कोरथस तंगदिल, ग्वंचे दहानुक कसम ॥

यारु दोदुय कूठ प्योम, बार अँशकुन मे गोब्योम ।
अँलिफु कदुसुय दाल गोम, सरवि रवानुक कसम ॥

स्वरमु नाजुक छुय अँछन, स्वरमु रूदुम नु वुछन ।
खश्मु हत्योप छुख बुछन, चेशिम मस्तानुक कसम ॥

चेशिम बादाम या छु ब्रम, रशिक आहूये हरम ।
नरगिस बागे इरम, चानि इरफानुक कसम ॥

उल्फतुच लॉयिथ कमंद, ज़ाल लोगुथ चीन-ओ-हिंद ।
छलु दिल कोरथम मे बंद, जुल्फे पेचानुक कसम ॥

जुल्फि सौंबुल प्यठ गुलन, लॉग्य्मत्य् ज़ाल बुलबुलन ।
आश्कन दिल तंबुलन, स्वंबलिस्तानुक कसम ॥

आशनॉई ऐ सनम, बे वफॉई दम ब दम ।
द्वन जुदॉई छे सितम, ताज़ु यारानुक कसम ॥

नाद लायय गुलबरो, सादु वँरथस गुलबरो ।
वादु डोलुहम दिलबरो, अहदो पैमानुक कसम ॥

तीर अँशुकुन दर जिगर, ह्यथ बु गेसू दर ब दर।
कर मे नेर्यम व्वन्य न्यबर, तीरे बारानुक कसम ॥

बुमु कमान मिच्च तीर, हॉव्यथम वँरथस असीर।
मारु गँय बर नाव पीर, तीर कमानुक कसम ॥

बे करॉरी यस दिलस, आसि माने ज़ानि तस।
नतु रोसुल मीर हावि कस, मोये म्यानुक कसम ॥

★ ★ ★ ★ ★

दिलाराम निगारो

रसूल मीर

दिलबंदु दिल आज़ारु दिलारामु निगारो ।
गुल खंदु गुल र्वख़सार, गुल अंदाम निगारो ॥

कद चोन अँलिफ लाम, जुल्फ मीम दहन छुय ।
पोर अक्लि सबक शक्लि अँलिफ लाम निगारो ॥

शमशाद कामथ गुलबदन, लब ग्वंचि सुंबुल मोय ।
बंगॉल्य जादू चेश्मु छय बादाम निगारो ॥

वुछ आफताबन चोन चंदन म्वख तु डोलुस रंग ।
गँज काचु तवय जून, छुस सरसाम निगारो ॥

सौंबुल छु त्रॉविथ कॉर लालन बर जिगर सुय दाग ।
छुय दामे काकुल खाले सियाहफाम निगारो ॥

खत कँडिथ अज़ खत गँयसु दर खत पेयसु जुल्फन मंज़ ।
अज़ शाम नीरिथ ताम वोतुम शाम निगारो ॥

दर जंग करान कारे खंजर दस्ते रँगीन चॉन्य ।
हम पंजु दस्तान छुय नु रुस्तुम-ओ-साम निगारो ॥

यस कारे थज़र आसि शमा रोय आतश खोय ।
योद मारि तस परवानु अज़ बहराम निगारो ॥

चथ गोख पानस प्वख्तु कोरथम याद फरामोश ।
कुस न्वक्तु वनय बालि द्युतुहम जाम निगारो ॥

च्यूनूम नु चोलुम यार आरुदमुत सु पारुद ज़न ।
आराम न्यूथम ज़ांह नु गोहम राम निगारो ॥

गिल ज़न बु छुनय जामु च़ैटिथ, नेरु बु बाज़ार ।
पदमॉन्य आशक छस च़े पतु बदनाम निगारो ॥

छुम जान कॉसिद पानु पृछिज़्यस हाले दिल आज़ार ।
नय खामु ज़ानय नामु तय पैगाम निगारो ॥

सीतायि गथ कॅर्य लोलु नारस बालुयारस पथ ।
कम गीत वॅन्य वॅन्य राम कोर तमि राम निगारो ॥

दर दोरे हुस्नत चेशु वुछिथ कासु गदा चॉन्य ।
ख्वरशीद तय जमशीद ह्यथ छी जाम निगारो ॥

दिथ छालु च़ोलुहम, कोलु डोलुहम, दोलु वुछथम नो ।
लोल आम व्वंदस होल कर ज़ांह द्राम निगारो ॥

रोसुल छु ज़ॉनिथ दीन-ओ-मज़हब र्वख तु जुल्फ चॉन्य ।
कवु ज़ानि क्याह गव कुफुर तय इसलाम निगारो ॥

★ ★ ★ ★ ★

व्वलय कोस्तूर्यये

रसूल मीर

चोन पकनुय परजुनोवमय दूर्यये ।
व्वलय कोस्तूर्यये, पूर्य मय त्राव नीर्यये ॥

मटन वुडिरे हुक सान छख खसान
टिकु दार कसाबस ग्रायि छखय मारान ।
कोंकुल मस्तस म्वख्तु शूबिये जूर्यये
व्वलय कोस्तूर्यये, पूर्य मय त्राव नीर्यये ॥

नावि नमस प्यठ हम तु खूर छख वायान
यिमु नुय आशकन तीरि मिच्चगान लायान ।
हम गोम आबस, नम रठतय यूर्यये
व्वलय कोस्तूर्यये, पूर्य मय त्राव नीर्यये ॥

सुलि वॅथिथुय च्चौर्य द्रायिखय काठस
बदनाम कोरथस खनुबलुकिस गाठस ।
काठु कॉन्य जॉलिथ नार गोवुये सूर्यये
व्वलय कोस्तूर्यये, पूर्य मय त्राव नीर्यये ॥

वेर नागय नेरुये बु आगुये
अछ वलु की पोश शेरे लागुये ।
वछु मंजुलिस मंज रछथ दछि मूर्यये
व्वलय कोस्तूर्यये, पूर्य मय त्राव नीर्यये ॥

छाय डीशिथ रोसुल मीरस जॉन्खय
कदे सनोबर, सर्वि बाला मॉन्खय ।
दय येलि दी तय, ड्यक पनुने पूर्यये
व्वलय कोस्तूर्यये, पूर्य मय त्राव नीर्यये ॥

★ ★ ★ ★ ★

मे छु मूरे ललवुन नार रसूल मीर

गछ तु वेसिये, लालु छुम दूरे। मे छु मूरे ललवुन नार।।

हशि लोयनम जॉविजि मूरे, पूचि कोरनम पॉट्य अंजोल।
गछु माल्युन तिम छिम दूरे, मे छु मूरे ललवुन नार।।

माजि रँछनस कंदु कोस्तूरे, आमि द्वदु सुत्यु नॉवनम तन।
सुय पान लोगुम मेचि मोज़ूरे, मे छु मूरे ललवुन नार।।

गरि द्रायस गरिक्क्यन चूरे, नीलु नागय लूसुम द्वह।
राथ लँजिमो राह मुसाफूरे, मे छु मूरे ललवुन नार।।

डँब्बु दादे त्राव्यम चीरे, डँब्बु दॉद्य कँरुस फलवा।
यस नु दय दियि ड्यक कति पूरे, मे छु मूरे ललवुन नार।।

पथ वनु छुख किनु पथ वीरे, योर अनतन ख्वनि ललवान।
न्यथु नँन्थु छस दज़ु मा तुरे, मे छु मूरे ललवुन नार।।

आयि कुकिला मॉदान दूरे, स्व छे परान अल्लाह हू।
स्व छे लँजिमुच्च वालु वाशु दूरे, मे छु मूरे ललवुन नार।।

यि छु रोसुल मीर शाह आबाद डूरे, तँम्यु छु त्रोवमुत लोलु दुकान।
यी दुआ आशकव चैवु टूरि टूरे, मे छु मूरे ललवुन नार।।

★ ★ ★ ★ ★

शर मे जिगरस द्राम नय

रसूल मीर

थरु थरु छम मरु शायद, शर मे जिगरस दराम नय ।
ख्वश यिवुन नुंदबोन वेसिये, म्योन दिलबर आव नय ॥

वादु कोरमुत याद छुय ना, सादु कुच्चा जॉन्थस ।
आदनय अदु कोनु थाव्योथ म्योन दिल संबलावनय ॥

यारु अख अरमान रूदुम, अश्कु पेचानस पृछोम ।
बूज़िथुय रज़ि पान खोलुन, आव ज़न अबसावनय ॥

छायि रूदुख ज़ायि वॉरथस, कव च़े मँठुय माय म्यॉन्थ ।
तेलि च़े फेरी ना मे वनतम, येलि मे मेज़ि तल सावनय ॥

गुल वुछिथ बुलबुल छु तोशान, अख अँकिस रूशिथ वनान ।
म्यानि यारो चानि बागुक रूद मे गुलज़ार छावनय ॥

सुय मे रूदुम आश येम्युं सुंज़ सथ मे ऑसुम यथ दिलस ।
वनतु रोसुल्यो कस च़ु रूदुख, व्वन्थु कमु मनुनावुनय ॥

★ ★ ★ ★ ★

रिदु पोशि माल गिंदुने द्रायि लोलो रसूल मीर

शूबि शाबाश चानि पोत छा़यि लोलो ।
रिदु पोशि माल गिंदुने द्रायि लोलो ॥

राज़ हाँज़्यानि नाज़ क्या अँज़्युनि गर्दन
या इलॉही चेश्मु बद्दु निशि रछतन ।
गछि क्या कम चानि बारगाहि लोलो
रिदु पोशि माल गिंदुने द्रायि लोलो ॥

कालु मोयस टाकाँन्य् छय बरसर
फँल्य्लु नाफय मोलमुत मुश्कि अदफर ।
हँज़ि पाँरान च्वँजु तय दायि लोलो
रिदु पोशि माल गिंदुने द्रायि लोलो ॥

जाँल्य् वाँकन बाल येलि लागि शुमार
पछ लगनस गँज़रुनस लछ तय हज़ार ।
तमि शायि नो म्वकलन पायि लोलो
रिदु पोशि माल गिंदुने द्रायि लोलो ॥

रवनि ग्वडुकुय यामथ बूजुम साज़
साज़ बोज़ुनि आमुत राज़ यँदराज़ ।
पोशि मालु छम पोशि तुल्य् डायि लोलो
रिंदु पोशि माल गिंदुने द्रायि लोलो ॥

हल्कु बंदु तँल्य् शुबान नारे पिस्तान
ती डीशिथ आशकन दिल लूबान ।
वोल रोसुल मीर चाने मायि लोलो
रिंदु पोशि माल गिंदुने द्रायि लोलो ॥

★ ★ ★ ★ ★

क्याह वनुयो मति अर्यनिमाल

क्याह वनुयो मति क्याह वनुयो

यी गोम पानस तु ती वनुयो
लान्युन न्याय छुम तु ती वनुयो
क्याह वनुयो मति क्याह वनुयो

बागस म्यॉनिस बादाम फुलुया
आदनु रॉवुस तु ती वनुयो
क्याह वनुयो मति क्याह वनुयो

बागस म्यॉनिस चेरु फुलुया
वेरि चानि फोजमा तु ती वनुयो
क्याह वनुयो मति क्याह वनुयो

बागस म्यॉनिस गिलासु फुलुया
दिलासु द्युतथाम तु ती वनुयो
क्याह वनुयो मति क्याह वनुयो

बागस म्यॉनिस टंगु फुलुया
लंजि लंजि फोजसा तु ती वनुयो
क्याह वनुयो मति क्याह वनुयो

बागस म्यॉनिस ऑल्यचि फुलुया
लोलुची करिथम तु ती वनुयो
क्याह वनुयो मति क्याह वनुयो

★ ★ ★ ★ ★

ञोलुमय यार वेसी

अर्यनिमाल

यान्य हूरि मे तूरि चंदुन मोलुमय
तामथ ञोलुमय यार वेसी

दप्योम आगस, बो रोशि ज़ागस
लागस बो शेरि ही
व्वंदुकिस बागस पोशाह फोलुमय
तामथ ञोलुमय यार वेसी

★ ★ ★ ★ ★

अर्यनि रंग गोम श्रावन हिये

अर्यनिमाल

अर्यनि रंग गोम श्रावन हिये
कर यिये दरशोन दिये

शामु स्वंदुर्य पामन लॉजिस
आमतावव कोताह गॉजिस
नामु पैगाम तस कुस निये
कर यिये दरशोन दिये

कंदु नाबद आरादमुतुय
फंदु कॅरिथ चोलुम कोतुय
खंदु कॅर्यनम लूकन थिये
कर यिये दरशोन दिये

सुलि व्वथव संगरमालन
लालु छारोन कोहन तु बालन
प्रारान छस बु तॅहिंज़ि ज़िये
कर यिये दरशोन दिये

★ ★ ★ ★ ★

हृदयि लोमुनम

अर्यनिमाल

हृदयि लोमुनम नैदरि हृदयि मृदयि
मृदयि मृदयिबंद सैनिथ गोम
स्वन न्यूनम रृदयि रृदयि
वुन्यूब वरृरिथ गोम
वनतु वेस्य् व्वन्य् कुस कस पृदयि

★ ★ ★ ★ ★

रातस ओसुम लॉरिथ अॅर्यनिमाल

रातस ओसुम लवु ज़न लॉरिथ
सुबहस प्रवि क्यथु त्रॉविथ गोम
बबरि च़मन अशि सगुनॉविथ
ऑशिमोत कवु पशिनाॅविथ गोम
सवाल कॅर्यतोस हियि गछि छॉविथ

★ ★ ★ ★ ★

आलव दीतोसे

अर्यनिमाल

मे शोकु यारु सँदि बँरिमस प्यालु तु

आलव दीतोसे

तरवुनि मर्गय वसवुनि बालु तु

आलव दीतोसे

क्याह करु नियिनम हरनुनि छालु तु

आलव दीतोसे

कंद तय नाबद बँर्यमस थालु तु

रंगु रंगु नीतोसे

जोद गव आशकन दोद क्यथु चालु तु

आलव दीतोसे

★ ★ ★ ★ ★

कॅहंदि बो ज़ायस

अॅर्यनिमाल

वुछतु वेस्यु कॅहंदि बु ज़ायस
बागुनि आहस कॅहंदि ताम
द्वह अकि मॉल्यु माजि नगरु हरशायस
शहरुच ऑसुस वॉचुस गाम
सति दोह्य फीरिथ मालिन्यव अन्यायस
बागुनि आहस कॅहंदि ताम

द्वह अकि श्रेहु सान मालयुन गॅयायस
उचकु बजि काकुनि दिचुनम पाम
उचकु रॉछ ज़्यवुनुय कोनु म्वयायस
बागुनि आहस कॅहंदि ताम

★ ★ ★ ★ ★

अदु कर यियम तय

अर्यनिमाल

अदु कर यियम तय
बरुसय मलुर्यव मलुर्यव
चेयिना सना मस
छाविना सना मस

कमि स्वनि हॉवुनस तन
कॉल्य हय वुहुनम पॉठ्य ? संगरन

हलि छुस खंजर तय
तीर हय लॉयिनम पोशि पंजरन

★ ★ ★ ★ ★

पदमॉनी कर यियम

अॅर्यनिमाल

पदमॉनी अदु कर यियम तय
वदुनस छुम ना छ्यन
ओश छस त्रावान चालि चालि
मसि कर छम त्रॅहन
लशि नारु जॉजिनस, म्यूलुम ओश तु अन्न

★ ★ ★ ★ ★

आदन बाजि म्यानि यारो वे अर्यनिमाल

हा व्वलि म्वन्य ? हो वंदय पादन
आदन बाजि म्यानि यारो वे

आदनु आँसुस रँजलु ? नादन
यावुनस कदुर नो जॉनिय मे
दित्तुमो दरशोन छम चॉन्य लादन
आदन बाजि म्यानि यारो वे

कुकिलि पीर्य कवु त्रॉविथ क्वलुरादन
दुकलि व्वंदु म्योन गव
मे कलि चानि ब्रॉथ्य गॉम नादन
आदन बाजि म्यानि यारो वे

च्रेनतो लडुर्य पोश फोल्क क्वलुरादन
अज छुम आदन, वातुहम हय
दिहँमय दरशोन सर वंदय पादन
आदन बाजि म्यानि यारो वे

★ ★ ★ ★ ★

वृज़मलु ज़न द्राव
अर्यनिमाल

चमकान ओबरु तलु वृज़मलु ज़न द्राव
आयि ग्रायि छायिगँत्य् करान ज़न आव

डोटु फोल किथु रूद नबु नार बरान
गगरायि करान च़ोल ज़न वाव
नेहृछति अनिगटि मुशनस शामन
मे बॉल्य् थोवुनम सुय आमताव

★ ★ ★ ★ ★

गुं गुं मो कर यँदरो
अँर्यनिमाल

गुं गुं मो कर यँदरो
कनुर्यन फँलिलय मलयो

रबि तलु कँर तुल हा सँबुलो
यँबरज़ल प्यालु ह्यथ प्रारान छय
हियि थँर छस तय दुबारु फवलुयो

★ ★ ★ ★ ★

यारु लोल हो आम चोनुय अर्यनिमाल

कावु रंग कोरथम हावू दीदारो
यारो लोल हो अअम चोनुय

छांडान लूसस गामु शहारो
डेछा ? सौरिय, च़ेय ह्यू नु कांह
तनि तोफ लॉयिथम गुलि बॉबूरो
यारो लोल हो आम चोनुय

★ ★ ★ ★ ★

आशो वे अर्यनिमाल

आशावादन हुंदि आशो वे
गटि मंजु हावतम गाशो वे

लासन ? गोमो राशो वे
प्रारान छसयो आशो वे
म्यत्रन हुंदुय ब्योला वॅविजे
शॅथरन ति कॅर्य जि नु नाशो वे

★ ★ ★ ★ ★

बालि राह क्या छुमय अर्यनिमाल

ज़ार वनतस हा वेसी
बालि राह क्या छुमय

आरु रोस्त गॅछिथ रूदुम निशि परज़्यन
नार गौडुनम यनु बूजुम निशि परज़्यन छुमय

तनु हय वेस्य् तमि दादि छुम नु पकान
मे छु तमना बालि तँहुंद, निशि यार गोछुमय

★ ★ ★ ★ ★

वोद अमि कुकिले

अँर्यनिमाल

वोद अमि कुकिले दिल म्योन दोदुय
हा वँम्यु रिद्य बूज म्योन कुकू कू

लॉलि तु मजनून्यु नरदस गिंदुय
त्रोवुन शशपंज प्योस दुखाल
लॉलि हुंद हावसा दावस लोगुय
वुछ तु वेस्यु यार म्योन चोलुय

यार दय ? स्यठाह म्वलुलुय छुम
रछाम नालु तु वुछनम होलुय

★ ★ ★ ★ ★

छोलुम तु छोकुम अर्यनिमाल

वनतु कवय दूरि रूदुम
यान्य मे मोलूम तूरी छांडुन ?
दोब्य वानु छोलुम तु छोकुम
कूठ प्योम यारु दोद
छलु-छोक ? नाहकय रॉविम

★ ★ ★ ★ ★

म्योन ह्यू कस गव अर्यनिमाल

अस मय वेसी म्योन ह्यू कस गव
यस गव मसवलि ग्वंदुर हवॉय ?
रोबु खानु बिहिथुय दॅरीचस ठस गोम
ज़ोनुम सुय मा आंगन च़ाव
यार नय ड़्चूतुम वॉलिंजि च़स गोम

★ ★ ★ ★ ★

म्योन वतन

अब्दुल अहद आज़ाद

तोशान क्याह छु पोशन, म्योनय वतन मुबारक ।
कैर्यतोस रोशि रोशे, पोशे वतन मुबारक ॥

नुंदुबोन क्याह वतन म्योन, वुछ वुछ फवलान बदन म्योन ।
क्वरबान यि जुव तु मन म्योन, अमिच्यन वतन मुबारक ॥

छिस बॉगरान मुहब्बत, बुलबुल कुमिर करान गथ ।
छिस प्याल ह्यथ अथन क्यथ, पोशे चमन मुबारक ॥

छिस बेकरार आरु, ह्यथ लोलु खारु खारु ।
बोसु करान वारु, कोह दामनन मुबारक ॥

सब्ज़ार फर्शे मखमल वथरुन शिहिल्य कुल्यन तल ।
मर्गन नयन तु डारन, वार्यन वनन मुबारक ॥

वुछ सब्ज शॉमियानु, नुंदु बॉन्य सायबानु ।
यिम लोलु सानि पानु गँड्य क्वदरतन मुबारक ॥

यिमु पोशि लंजि ग्राये, मारान कमि आये ।
हू हू करान दाये ज़न मिसुमन मुबारक ॥

शबनम छकान जवॉहिर, पोशन छि रोशि रोशे ।
कोचन वतन छकान पोश, मुश्के खतन मुबारक ॥

कथ सरहदस छि यिथ्य गोश, कथ वारि मंज छि यिथ्य पोश ।
फॅल्य फॅल्य यिवान दिवान जोश, बॅर्य बॅर्य चमन मुबारक ॥

प्रथ तरफु जोयि लारान, आरु कत्यन छि छारान ।
प्रथ जायि नाग प्रारान, त्रेशि हत्यन मुबारक ॥

पम्पोशि डल छि खामोश, ज़न रूठ्यमुत्य रडटिथ बोश ।
पां च़ादरन यिवान जोश, प्यठ संगरन मुबारक ॥

त्रॉविथ गर्ज तु हावस, लोलाह बु बाँगरावस ।
कमि रायि बो थावस, जुव आयतन मुबारक ॥

तिम प्रॉन्य दास्तानु, गव सुत्य ह्यथ ज़मानु ।
नॅव्य नॅव्य परस तरानु, नॅव्य नॅव्य स्वखन मुबारक ॥

रोज़्या सु इन्तिज़ारस, अथ श्रावनस तु हारस ।
यस दर्दु नवबहारस यिथ्य गुल पवलन मुबारक ॥

ऐ दिल च़ु गछ मु व्वबॉल्य, पॉराव लोलुची डॉल्य ।
आलव दिलुक्य गछन कॉल्य, दिलु क्यन कनन मुबारक ॥

खोचुन डरुन च़े कुस छुय, रुत फल मेहनतस छुय ।
हुबे वतन च़े बस छुय, दोपनम मनन मुबारक ।

आज़ादु छी नु दनु द्यार, वतनुक च़ु छुख वफादार ।
तन दिथ तवय वतनदार, च़ान्यन कथन मुबारक ॥

★ ★ ★ ★ ★

शमा

अब्दुल अहद आज़ाद

होश कर पौंद लोलु देवानय ।
गोश थाव बोज़ अफसानय म्योन ॥

येमि यकसानुकि हालि मॉदानय
कुस पनुन कुस छु बेगानय म्योन ।
युथ मे निश ह्यौद तु त्युथ मुसलमानय
गोश थाव बोज़ अफसानय म्योन ॥

दीन म्योन मिलुन्नार दर्म यकसानय
सारिनुय क्युत छु नूरानय म्योन ।
युथ मे निश काबु तु त्युथ बुतखानय
गोश थाव बोज़ अफसानय म्योन ॥

वदुनस म्यॉनिस असुवुन तरानय
गमुसुय मंज़ छु शौद्यानय म्योन ।
अदु गॉय रोशन चॉन्य गटुखानय
गोश थाव बोज़ अफसानय म्योन ॥

गथ करान लोलस दौद अकी आनय
जान क्याह लोलु देवानय म्योन ।
म्यॉन्य पौठ्य दज़ु दज़ु छुन नु प्रथ आनय
गोश थाव बोज़ अफसानय म्योन ॥

गटि मंज़ु बो छुसय गाश हावानय

सोज़ि दिल साज़ो सामानय म्योन ।
कति क्याह येति योर ज़ानख पानय
गोश थाव बोज़ अफसानय म्योन ॥

बोज़वुनि सोज़ म्योन छुय नु कुनि वानय
दीदव वुछ च़ दास्तानय म्योन ।
लोलुकिस नारस नूर ननिवानय
गोश थाव बोज़ अफसानय म्योन ॥

क्वदरतन द्युतुनय गाश इनसानय
ज़ाननुक थोवुनय बहानय म्योन ।
लाग ? ? चानि छुस बो ति अख दानय
गोश थाव बोज़ अफसानय म्योन ॥

आज़ादु मीठ्य क्याह चॉन्य यिम तरानय
च़े ल्यूखुत जान अफसानय म्योन ।
दज़नुक दोद ज़ानि दोदमुत पानय
गोश थाव बोज़ अफसानय म्योन ॥

★ ★ ★ ★ ★

ग्रीस्य नामु

अब्दुल अहद आज़ाद

ख्बदायन जुव दितुम पँज्य पॉठ्य, तिहुंजुय मेहरबॉनी छम ।
वले बाक्युय यि आसुन गोछ, स्व पनुनी जान फिशॉनी छम ॥

वनय कोताह थवख क्याह याद बोज़ख कुत्य् अफसानु ।
पनुन्य मुश्किल कहॉनी याद सरतापा ज़बॉनी छम ॥

न छुस शॉयिर न छुस अफसानु लेखन वोल नय ऑलिम ।
न हावस बॉतु बॉज़ी हुंद न यिवान शारखॉनी छम ॥

गँमुत्य् सुराख सीनस छिम तु नयि हुंद्य पॉठ्य नालान छुस ।
न छुस नोज़ुख तबीयत नय तगान नोज़ुख बयॉनी छम ॥

ग्वलॉमी हुंद्य ज़मानन सर्फु सुंद्य पॉठ्य नाल वोलमुत छुम ।
अँमी ज़हरन तु खोफन पॉदु वॅरमुच्च नातवॉनी छम ॥

फँकीरी नातवॉनी मंज़ गॅरीबी कम ज़बॉनी मंज़ ।
व्यपान कति काँसि हुंज़ ज़ोरावरी या पहलवॉनी छम ॥

ख्बदायन पॉदु वॅर्य बाक्युय युहुंद रथ माज़ म्योनुय खून ।
यिवान ऑसुम नु च़ख बिलकुल वलेकिन व्वन्य् यिवॉनी छम ॥

वुछान छुस यथ ज़मानस कुन, नज़र त्रावान पानस कुन ।
तिमय दुश्मन यिमन किज़ वक्फ थॉवमुज़ ज़िंदगॉनी छम ॥

गॅरीबन ग्रेसत्यन हुंज़ तरजमॉनी शूबि आज़ादस ।
पसंद काँचाह यिवान तहँद्यन खयालन हुंज़ रवॉनी छम ॥

★ ★ ★ ★ ★

आसमानुक्य तारख वनान इन्सानस

अब्दुल अहद आज़ाद

चु ओसुख गाटुजारुक नूर, लोगुथ नार इन्सानो ।
कैरुथ इन्सानियत बदनाम, हा बे आर इन्सानो ॥

मुहब्बत बाँगरावुन क्युत कर्योनख क्वदरतन पाँदा ।
चे लोगुथ दीनो ईमानस करुन बापार इन्सानो ॥

थव्योनय क्वदरतन पनुन्यन खज़ानन ठान मुच़रॉविथ ।
चे ओसुय बाँगरॉविथ ख्योन, बन्योख शहमार इन्सानो ॥

कुनुय आलम, कुनुय आदम, नमस सुत्य् माज़, माज़स नम ।
यि कॅम्य् त्रॉवी दिलस अंदर दुयी हुंद नार इन्सानो ॥

बन्योख दर्मुक तु दीनुक थम, न दीनुक गम न दर्मुक गम ।
करान इन्सानियत मातम, वुछिथ चॉन्य् कार इन्सानो ॥

पज़्या द्युन सीनु इन्सानस तिथिस दीनस तु ईमानस ।
करान कुनिरस तु यकसानस छु युस दौगिन्यार इन्सानो ॥

कोरुथ फितनन फसादन नाव दीनदॉरी, वतनदॉरी ।
वनान यथ छुख चु बेदॉरी, यि छुय खुमार इन्सानो ॥

दितुय ब्रम पनुन्यवय कारव, दिवान छुख कुस्मतुक्य बारव ।
तरान छुख प्रानिवुय तारव, लगी कति तार इन्सानो ॥

दिलस मंज़ इज़तराबाह छुय, हुबाबन हुंद हिजाबा छुय।
यि सोरुय म्यूठ खाबा छुय, च़ु गछ बेदार इन्सानो।।

जिगर पारन तु गमख्वारन, रँफीकन दोस्तन यारन।
जिगर किथु पॉठ्य कतरावन, च़ु छुख खूनख्वार इन्सानो।।

दिवान छुख पनुनिसुय बागस च़ु मूलन द्रोत पँत्रन सग।
गरस पनुनिस च़ु छुख पानय करान लुर पार इन्सानो।।
दितुय हॉविथ च़े आज़ादन, छु क्याह इन्सानु सुंद आदन।
च़ु नय कन थावहस नादन, ग्वबान छुय बार इन्सानो।।

★ ★ ★ ★ ★

बु नो ज़रु अँश्कु बेमॉरी

अब्दुल अहद आज़ाद

मदनवारो लगय पॉरी। बु नो ज़रु अँश्कु बेमॉरी॥

चे सुत्य गछि फुरसथाह आसुन्य
दिलस गछि फरहथाह आसुन्य।
मे गॉमुन्न नॉल्य नादॉरी
बु नो ज़रु अँश्कु बेमॉरी॥

चे छय ऑशु मत्यन सुत्य लय
छुहख चावान वसलुक म्वय।
मे प्यठ कति वाति अनवॉरी
बु नो ज़रु अँश्कु बेमॉरी॥

चे छुय जुल्फुक तु खालुक गम
मे छुम मोसूम अयालुक गम।
बु छुस मिसकीन चु दरबॉरी
बु नो ज़रु अँश्कु बेमॉरी॥

खज़ानन ठान मुन्नरोवुथ
बेयन क्युत स्वन तु र्वफ थोवुथ।
मे क्युत ओसुय हरुद हॉरी
बु नो ज़रु अँश्कु बेमॉरी॥

जदस युस आलु मटि ओसुम
वुनिस ताम सुय नखस प्यठ छुम ।
बु क्याह हावय दिलावॉरी
बु नो ज़रु अँशकु बेमॉरी ॥

यियम येलि राखु फारिष्टर
दिमख नय केंह अनन रेंजर ।
गछ्छयम विरि ज़्युन ति सरकॉरी
बु नो ज़रु अँशकु बेमॉरी ॥

पकुन छुम कारो बेगारस
बरुन छुम जिन्स सरकारस ।
यियम वुगरायि बापॉरी
बु नो ज़रु अँशकु बेमॉरी ॥

पगाह छुम हँदयि द्युन पीरस
थव्यम कन तोबु तकसीरस ।
कयामँच़ दूह कर्यम यॉरी
बु नो ज़रु अँशकु बेमॉरी ॥

हँडिस करि हून, हूनिस होंड
कँडिस करि पोश पोशस कौंड ।
करुन छुम रॉज्य पटवॉरी
बु नो ज़रु अँशकु बेमॉरी ॥

बु करु यीचन बलायन क्याह
खुर्यन पनुन्यन तु न्यायन क्याह ।
मे छम जँख्य जँख्य ति बेकॉरी
बु नो ज़रु अँशकु बेमॉरी ॥

वनान यिम दूरि छिम जॉहिल
दितख इन्सानु सुंद ह्यू दिल।
दिहख नय अँछ, दितख टॉरी
बु नो ज़रु अँशकु बेमॉरी ॥

★ ★ ★ ★ ★

विग्यनि वनवुन

अब्दुल अहद आज़ाद

लोलु बागस आवय नोव बहार वेसिये ।
नेरी छावुनि गुल तु गुलज़ार वेसिये । ।

आयि पॅल्य पॅल्य पोशिवुनि पोशिवारे
द्रायि छावान लछि बज़ अछुदारे ।
जायि जायि फीर्य मुश्कनुय दार वेसिये
नेरी छावुनि गुल तु गुलज़ार वेसिये । ।

त्रावी प्रॉन्य कुसु तय अफसानय
त्रावी ज़ॉल्य ज़ॉल्य पंजरु तु ज़ोलानय ।
छावी यावनुक श्रावुन तु हार वेसिये
नेरी छावुनि गुल तु गुलज़ार वेसिये । ।

करी परवाज़ लॉगिथ सोज़ुक्य पर
फेरी थज़रन, पज़रुचि वुज़मलु कर ।
शोलुनावतख लोलु कोहसार वेसिये
नेरी छावुनि गुल तु गुलज़ार वेसिये । ।

छख च़ु तोशान साज़स तु सामानस
वाजि मरमन तु बेयि र्वनि दामानस ।
यि छु सोरुय नापायदार वेसिये
नेरी छावुनि गुल तु गुलज़ार वेसिये । ।

पायदौरी छि नावस तु वरतावस
न जि स्वरमस, तु साजस, पौरावस ।
पोशिवुन छा यि जोशिवुन नार वैसिये
नेरी छावुनि गुल तु गुलजार वैसिये ।।

छख च्चु हुस्नुक तु लोलुक अफसानु
बन मु असनुक तु गिंदनुक सामानु ।
पानु गुलशन पानु छख बहार वैसिये
नेरी छावुनि गुल तु गुलजार वैसिये ।।

पोशि मालस छि ऑशिमैत्य लूख छावान
म्वख्तु हारन छि प्वख्तु कार म्वलुनावान ।
तोशी पोशन बन च्चु म्वख्तु हार वैसिये
नेरी छावुनि गुल तु गुलजार वैसिये ।।

ग्रीस्य कूराह ऑस चंद्रहारुच जून
शाह यूसुफुन्यु माशोक हब्बु खातून ।
गाटुजारनुय कॅर स्व नामदार वैसिये
नेरी छावुनि गुल तु गुलजार वैसिये ।।

स्वन छु नर्मय नतु ओस यि ति सर्तल
छुनु लालस नरमी सुती म्वल ।
माने अमिकुय जानि दिल हुशार वैसिये
नेरी छावुनि गुल तु गुलजार वैसिये ।।

लोलु नादन गोश थाव आज़ादस
वुनि आदन ओसुय पतु सादस ।
छुय गॅनीमथ युथ वफ़ादार वैसिये
नेरी छावुनि गुल तु गुलजार वैसिये ।।

★ ★ ★ ★ ★

जानानु छुम नु बोज़ान

अब्दुल अहद आज़ाद

जानानु छुम नु बोज़ान सोज़ुक तरानु वेसिये ।
यिम दौद्य वॅमिस रॅफीकस बौविथ बु ज़ानु वेसिये ॥

ललुवान यि लोलु खंजर, वॉलिंजि छुम चलान शर ।
बेयि सोज़ि ना सु दिलबर केंछा निशानु वेसिये ॥

लॉगिथ बु नेरु सॅन्यास, फेरस वनन मॅलिथ सास ।
तस रोस यि स्वन तु अतलास, छुम जेलखानु वेसिये ॥

येलि ओस ताज़ु उल्फत, अॅनिमस नु रोबु कांह कथ ।
कुनि सातु गछतु पृछतस, ती गौयिबानु वेसिये ॥

क्याहताम खारु ओसुस, ग्वडु वॉजिनस बु नावे ।
व्वन्यु छुम करान सितमगर, कम कम बहानु वेसिये ॥

रोवुम मे बालु यस पथ, यावुन अराम तु राहत ।
ऑसुम तु छम तॅहुंज सथ, गंज तु खज़ानु वेसिये ॥

छस मॉर्य मॅज अवारु, करि ना सु म्योन चारु ।
वॅनिज़्यस च़ु वारु वारु मोदरे दहानु वेसिये ॥

काबस अंदर च़ु बदमस, प्यठ मिम्बरन च्यवान मस ।
तिमु स्वरमु छेश्मु डीशिथ, सपनान गुमानु वेसिये ॥

कुनि छुम नु ड्यूठमुत ज़ांह, त्युथ ब्याख नाज़नीनाह ।
रावान छुस वनय क्याह तँम्य सुंद निशानु वेसिये ॥

या म्यॉन्य सितम तु बेदाद, नतु आरु कोत सु आज़ाद ।
कुनि सातु छिम यिवान या । तिम दास्तानु वेसिये ॥

★ ★ ★ ★ ★

कॅरुथ बे-वफाँयी वफादारु म्याने

अब्दुल अहद आज़ाद

कॅरुथ बे-वफाँयी वफादारु म्याने ।
सितमगारु बा-आरु ल्वकचारु म्याने ॥

करय पोंपरिन्यु गथ बु अथ शमा रोयस ।
दमाह रूबरू बेहतु महपारु म्याने ॥

कमस स्वंदरन सुत्यु यारानु लोगुथ ।
थोवुथ खारु ललवुन मे गुलज़ारु म्याने ॥

बरान शॉद्य यिम दॉद्य रछि हा दिलस मंज़ ।
चु योद यारु वनुहख मे बेमारु म्याने ॥

यि छुय म्योन सर तु यि छुय म्योन सीनु ।
तुलान क्याज़ि तलवार छुख खारु म्याने ॥

छिहम वादु कॅर्यु कॅर्यु करान जिंदु मॅर्यु मॅर्यु ।
प्यवान पूरि क्याह छय त्रे आज़ारु म्याने ॥

मदनवारु च़ोलुहम बदन नारु ज़ॉलिथ ।
ख़दा रहम कॅरिनय मुदावारु म्याने ॥

सु जानानु मुश्ताक झानानु पानस ।
वनान यस यि आज़ाद गमखारु म्याने ।



वुछन कर गुलबदन

अब्दुल अहद आज़ाद

वुछन कर गुलबदन गुलफाम लँतिये ।
पँरी सूरत पँरी अंदाम लँतिये ॥

सिरुक सरपोश तय नाज़न खँरीदार ।
कनुक स्वन तय मनुक आराम लँतिये ॥

बु सोज़स लोलु नाबद ऑलु शीरीन ।
खँज़ुर जलगोज़ तय बादाम लँतिये ॥

कसम द्रिय ह्यथ द्युतुम तस कॉफिरस दिल ।
खबर छनु आसि क्याह अंजाम लँतिये ॥

हवस छुम तनि तन लॉगिथ वनस हाल ।
बँनिथ कॉफिर अँनिथ इस्लाम लँतिये ॥

अँछन तल सातु सातय छुम तसुंद रोय ।
निहस ना बस युतुय पॉगाम लँतिये ॥

लछे वँरनस ह्ये न्यूनम वँडिथ स्वन ।
यछे लोलस यि क्याह फल द्राम लँतिये ॥

दशि गंडुनॉवनस प्रथ आस्तानस ।
जहानस दशिरोवनस खाम लँतिये ॥

छु नादान बुलहवस कॉफिर ग्वनाहगार ।
मलामत आशकस छा पाम लॅतिये ॥

वुछुम येलि यार सूरत ओस आज़ाद ।
रिवान ह्यू अज़ मै बोज़नु आम लॅतिये ॥

★ ★ ★ ★ ★

व्वलो मो रोश

अब्दुल अहद आज़ाद

अमारय चानि गौडनम जोश
व्वलो मो रोश बु मारय पान ।
चु छुख म्यान्यन सिरन सरपोश
व्वलो मो रोश बु मारय पान ।।

वंदय येमि शुर्य पानुक संज़
बु ललवथ लालु दीदन मंज़ ।
शूबख च़य अथ डलस पम्पोश
व्वलो मो रोश बु मारय पान ।।

चु गोमुत नावु सॉलन मस्त
च़े प्रारान प्यालु ह्यथ दर दस्त ।
निशातुक्य शालुमॉरुक्य पोश
व्वलो मो रोश बु मारय पान ।।

यि बदनुक जोश तु अँदर्युम ज़र
यि छुम दिलदारु चोनुय शर ।
लुकन हुंज़ु पामु चोन खामोश
व्वलो मो रोश बु मारय पान ।।

बु क्याह हावय वॉबीलु तु क्रोन
च़्यतस पाव यारु यावुन म्योन ।
लगय पॉरी कम्युक छुय बोश
व्वलो मो रोश बु मारय पान ।।

पोतुस पथ ज़र्ब छुख लायान
यि म्योन संतूरु दिल वायान ।
बिहिथ परदन अंदर रोपोश
व्वलो मो रोश बु मारय पान । ।

योहय छा बुलबुल आज़ाद
छु युस मंज़ लोलु बागस शाद ।
यिवान होशस गछान बे-होश
व्वलो मो रोश बु मारय पान । ।

★ ★ ★ ★ ★

लोलु चूरो म्योन दिल चय

अब्दुल अहद आज़ाद

लोलु चूरो म्योन दिल चय, जान चय, जानानु चय ।
आशना चय, बेवफा चय, यार चय, यारानु चय ॥

यावनुक देवानु हावस, शुर्य पानुक मूरि नार ।
फितनु चय, बाज़ार चय, कुस्सु चय, अफसानु चय ॥

आरुवलनुय खारु चाने, पारु पारु गॅय जिगर ।
नारु आँशकुनि बुलबुलन हुंघ दिल करान बिर्यानु चय ॥

राज़ बावान सोज़ चोनुय साज़ क्यन परदन अंदर ।
परदु चय, आवाज़ चॉनी, साज़ चय, सामानु चय ॥

कस वनन अहवाले दिल, यिम ज़ालु लॅग्यमुत्प जानवार ।
वाल वाशि तु ज़ाल चोनुय, वालु बॅर चय, दानु चय ॥

जेरु चाने शेर दिल नेरान मॉदानन अंदर ।
राज चय, ताराज चय, जंजीर चय, ज़ोलानु चय ॥

क्याह छु फुरकान, क्याह छि गीता, क्याह छि पूजा, क्याह नमाज़ ।
दर्म तु इस्लाम चोनुय, काबु तु बुत खानु चय ॥

गाटु पावान गाटुल्यन चोनुय यि सोदा दिथ फरेब ।
आशकन हुंदिस जनूनस, दौलतुक सामानु चय ॥

वलवला सोजुक तुलान आज़ादुनिस सीनस अंदर ।
गाह नेरान पर्दु थँव्यु थँव्यु, गाह यिवान ननिवानु च्युय ।।

★ ★ ★ ★ ★

कर साँ म्योन न्याय अंदे

महमूद गाँमी

कर साँ म्योन न्याय अंदे । मॉर्य मंदे मदनवारो ॥

छोंडुमख हनि हने, वनि आहम नो वफादारो ।
गोछुहम ब्रोंठु कने, मॉर्य मंदे मदनवारो ॥

शबु अकि यूर्य यितम, यारु म्याने सितमगारो ।
रोशि दीदार दितम, मॉर्य मंदे मदनवारो ॥

स्वनु छम पामु दिवन, कामुदीवो जानावारो ।
तनु वोतुम मे रिवन, मॉर्य मंदे मदनवारो ॥

दिल जान न्यूथ छलय, बेयि वनतु बु क्याह दारो ।
यिनु चानि सुम्बलय, मॉर्य मंदे मदनवारो ॥

कवु छुख दूर चलन, मे गॅयि चॉन्य कल वारो ।
करु क्याह लॉन्य छलन, मॉर्य मंदे मदनवारो ॥

खस्तु दिल गॅयसु खराब, मसु छॉवथस शराबखारो ।
छावतो ही तु ग्वलाब, मॉर्य मंदे मदनवारो ॥

कवु वॅरथस बु गटे, हटि तल के म्वख्तुहारो ।
गंडुथो अकि लटे, मॉर्य मंदे मदनवारो ॥

छौंडुमख सरहदन, कवु ज़ोलथम बदन नारो ।
तनु वोटुम मे रिवन, मौर्य मंदे मदनवारो ।।

आव महमूद गदा, ज़ार वनान ज़ोरावारो ।
बोज़तम बहरे ख्वदा, मौर्य मंदे मदनवारो ।।

★ ★ ★ ★ ★

कत्यू छुख नुंदबाने महमूद गॉमी

कत्यू छुख नुंदबाने । व्वलो माशोकु म्याने ॥

ब सूरथ छख च़ु पॅरी, च़े शूबुनय जामु जॅरी ।
कॅम्यू तॉवीज़ कॅरी, व्वलो माशोकु म्याने ॥

च़लोनय पज़िही नय, कवो ज़ोलुथ मे सीनय ।
च़े क्या गोय म्योन कीनय, व्वलो माशोकु म्याने ॥

मुकामन दूर छुखय, बु आसय बारु बुखय ।
मरय मा च़ानि म्वखय, व्वलो माशोकु म्याने ॥

फिराकन चॉन्य गोलुस, द्यमागन मदु वोलुस ।
खुमारन चॉन्य ज़ोलुस, व्वलो माशोकु म्याने ॥

मुकाबल ऑस्य आसन, अँकिस अख लोल कासन ।
सु अरमान रुद खासन, व्वलो माशोकु म्याने ॥

बुछान मे लोसु अँछुय, च़े क्याह गॅयि मनि मँछुय ।
यितम अज़ ज़ून पछय, व्वलो माशोकु म्याने ॥

खसख ना यारुबॅली, बु छलुहय खोरु पॅली ।
मे नो यिम दाग च़ॅली, व्वलो माशोकु म्याने ॥

बु बुछहय हुस्न-ने-जमाल, बुछान छुम जुल्फ तय खाल ।
छि ज़ॉलिम बॅल्य वलान नाल, व्वलो माशोकु म्याने ॥

शराबुक्य् प्यालु बरुयो, ग्वलाबन मालु करुयो ।
पगाह या काँल्य् मरुयो, व्वलो माशोकु म्याने ।।

व्वलो महमूद मो रोश, दितुय च्ने साहिबन होश ।
जुदौयी कर फरामोश, व्वलो माशोकु म्याने ।।

★ ★ ★ ★ ★

बु छस चॉन्ग् तलबदार

महमूद गॉमी

बु छस चॉन्ग् तलबदार, कत्यू यारु प्रारुयो ।
करान छस बु इन्तिज़ारु, कत्यू यारु प्रारुयो ॥

छुय च़े यूसफुन अनहारु, मॅच़ बु कॅरथस जुलेखा ।
च़ नय यिख तु बु पान मारु, कत्यू यारु प्रारुयो ॥

खबर ह्यम तु छस बेमारु, खबरि ज़ांह ति आहम नो ।
जिगरस पारु कॅर्यथम वारु, कत्यू यारु प्रारुयो ॥

हटि तलुकि म्वख्तय हारु, कनुक स्वन जरय च़े ।
म्वल करय लाल बाज़ारु, कत्यू यारु प्रारुयो ॥

हा सम्सारु बॉज़ीगारु, च़े क्याह खास सोदा छुय ।
पतु बो लागय खॅरीदारु, कत्यू यारु प्रारुयो ॥

महमूद गॉमी वनान ज़ारु, दाद्यन दवा छ़ांडान छुय ।
लिल्लाह हावतम दीदारु, कत्यू यारु प्रारुयो ॥

★ ★ ★ ★ ★

अर्यनि रंग गोम श्रावन हिये

महमूद गॉमी

अर्यनि रंग गोम श्रावन हिये । कर यिये दरशुन दिये ॥

म्वख होवनम बुर्कय तॅली, छ्वख दिथ यार च़ोलुम छॅली ।
वुछतु तिहुंजय अपुज़ दृये, कर यिये दरशुन दिये ॥

छायि रूशिथ गोमय अपॉरी, पायि बड़िस लगस बु पॉरी ।
रोशिवुनिस ख्वश आव यिये, कर यिये दरशुन दिये ॥

मॅचरॉविथ न्यूनम स्वने, बु ति करहॅस रोयस म्वने ।
गोम त्राँविथ रचन बिये, कर यिये दरशुन दिये ॥

सॉल्य् सिंगार छुस क्याह ज़लन, छुस नु मे कुन दिल तस रलन ।
वॉल्य् कनन मे बॉलिये, कर यिये दरशुन दिये ॥

मॉरनस अँम्य् दावादारन, म्वख्तु हारस छस कूत प्रारन ।
च्वंज़ु रूज़स बु बंदुगिये, कर यिये दरशुन दिये ॥

रुमु ज़ॉविजि बुमय वंजे, छुम करान वॉलिंजि खंजे ।
सज़ु पोश छिस व्वज़ॉलिये, कर यिये दरशुन दिये ॥

म्वख्तु नूरस, पोंपूर दशन, सोख्तगी नो मे ज़ांह मशन ।
प्वख्तु कारस ख्वश गोम यिये, कर यिये दरशुन दिये ॥

ज़रु ज़ॉजिथस कोताह ज़रय, बरु अज़तम हा दिलबरय ।
महमूदस अरमान छुये, कर यिये दरशुन दिये ॥

★ ★ ★ ★ ★

गम छुम यार मा रावे

महमूद गॉमी

ब्रम दिथ वॉजिनस नावे । गम छुम यार मा रावे ॥

अँद्य अँद्य फिरुस बागस, यार छुम मंज बाग नागस ।
पम्पोश मारान ग्राये, गम छुम यार मा रावे ॥

हाँजो नाव छय बहानय, तारु वोल तार दियि पानय ।
हम खूर नम रठ नावे, गम छुम यार मा रावे ॥

केंह आयि सॉलस सवॉली, केंह गॅय सालु निशि खॉली ।
वेंचन नु मेलान जाये, गम छुम यार मा रावे ॥

मोसूम जुव म्योन थारान, कांदुर्य वानु तलु प्रारान ।
लॉजिनस तुंदरने तावे, गम छुम यार मा रावे ॥

अँद्य अँद्य फेर्योस बालस, वलनय आस कँड्य ज़ालस ।
अति नो म्वकलन पाये, गम छुम यार मा रावे ॥

व्वलु वेस्यु गछवय सॉलस, हज़रतबलु किस मॉलस ।
डलु मंजु दीदार हावे, गम छुम यार मा रावे ॥

ज़ायोस मॉलिस तु माजे, तिम छिम अरबुक्य राजे ।
तिम छिम वुछान पोत छाये, गम छुम यार मा रावे ॥

? ? काँठु मालाह दूर कन, थफ दिथ नीनम आशकन ।
बँज़रिथ चैयिनम चाये, गम छुम यार मा रावे ।।

अँद्य अँद्य फ्यूरुस बवसरस, यारि दादि दप्याम मँज़्य तरस ।
तरुनस ऑसुम नु जाये, गम छुम यार मा रावे ।।
महमूद गॉमी बस युतुय, अँशुकुन ताकत वँम्य द्युतुय ।
वोनमुत मा मँशरावे, गम छुम यार मा रावे ।।

★ ★ ★ ★ ★

चानि बर तल राव्यम रॉच्चय

महमूद गॉमी

चानि बर तल राव्यम रॉच्चय । आवाज़ वॉच्चय नो ॥

खॉस्य् व्वज़ल्य् बॅर्ग छॉच्चय, छस स्वर्गच यॅबरज़ल ।
कॉल्य् मेलव कयामॅच्चय, आवाज़ वॉच्चय नो ॥

च्वंज़ शूबय बु खॅदमॅच्चय, ग्रॅज़ साहिबो हेच्चुथ नु ज़ांह ।
अदु नाव प्योम ललु मॅच्चय, आवाज़ वॉच्चय नो ॥

वनु हा यॅच्च अॅश्कुनि ब्रॉच्चय, कन थाव महमूदस ।
कमन सूरतन गछान म्यॅच्चय, आवाज़ वॉच्चय नो ॥

★ ★ ★ ★ ★

कोनय आमय यार

महमूद गॉमी

वुछान बालि गोम शामय । कोनय आमय यार ।।

लीख् लीख् लदस नामय, लेखनस छुमनो वार ।
अन्य तोम नामु पॉगामय, कोनय आमय यार ।।

खाबस मंज़ डेंछामय, यावुन ब्रम बॉज्यगार ।
सुय खाब अपुज़ द्रामय, कोनय आमय यार ।।

ऑशि मोत अशि मुकामय, लशि ज़न गॉडनम नार ।
नारस सूर गॅयामय, कोनय आमय यार ।।

महमूद शहर तु गामय, साहिबस छुय वनान ज़ार ।
वेसिये हीलु वन्यामय, कोनय आमय यार ।।

★ ★ ★ ★ ★

द्वद च्यतो दामु दामु गलि गले महमूद गाँमी

द्वद च्यतो दामु दामु गलि गले, हो हो बु करुयो अडुकले ।
रछिथो ख्वनि कनि मंजुले, हो हो बु करुयो अडुकले ।।

तल पातालय डेछोम खाब, खाबु मंजु गोस ना स्यठाह बेताब ।
नागु प्यठु रोदुस ना वुजमले, हो हो बु करुयो अडुकले ।।

बाबु म्योन यँद्राजु, शाह काँजी, कस वनु अजलन दिचुम बाँजी ।
पोशस नु अजलुनि हाँकले, हो हो बु करुयो अडुकले ।।

रोय चोन फोलमुत गुलि अखताब, हूर-पँरिया किनु छुख माहताब ।
ग्वलाबु रूठहमो मसवले, हो हो बु करुयो अडुकले ।।

लानि क्याह ओसुम, क्रानि द्रायस, दायितोन करुने योर आयस ।
महमूद छु गोमुत गांगले, हो हो बु करुयो अडुकले ।।

लोलु मंजु ललुवथ मनकु फले । हो हो बु करुयो अडुकले ।।

★ ★ ★ ★ ★

=====
Poetry of renowned Kashmiri Poets
Transformed into Standardised Devanagari-Kashmiri by
M.K.Raina
31.12.2004
=====